

Poaitamoa Komandhalohvna. Poaitamoa Komandhalohvna, Kristus Hev Vraohna Yonmba.

Yonmba Ishovna Hona Tombaimorinim Moamba.

¹ Memba honamba poaitamomba, levrapialmba Yesus Kristusna. Sesoa vraohna honamba poaitamomba Yesusmba, indthueinilm hevna andranindm, osm mani si lilnamba phovav. Wo Yesusva wolaihaprana hevna ovsongolnindrinimba, numlahamnalm hevna andranindrinim Yonm. ² Yonmba hona tombairava novol vewol wohvepiana manam manam temura, nomba himba temba nonglanamba. Nomba tanamolmom, temba Yesus Kristusva ishomnanamba hembra, nomba temba moamba Sesoanamini. ³ Yimba himba nomba honamba boaita ovrava moamba Sesoanamba, yeoa indk vethavra. Wo eva indhanamba himba nomba hillivrava moalamangva, wo vivrava, osva temba novol velohvpa, heoa indk vithivra. Doa nambaiva mumra vev, nonamba manimani honamba si phovavpa.

Yesusna Moalamangva Kristusnindm.

⁴ Yonnamini nom 7 pelaram Kristusnindm, hindm nom, hindm nom, indakonda yem Asi-approvinsnindm.

Sesoa, henoi ten avnam, eva lohvm, eva si provavm, heoa yemoa wavra vovhueinvrava, wo

os yimba undwonamba avav. Wo eva Sesoa-songolva, temba wohavpa murapetava Sesoana king kuwulna vuherava, heoa yemoa wavra vovhueinvrava, wo os yimba undwonamba avav.

⁵ Wo eva Yesus Kristus, hengas aralna moamba ambarava levraholothov. Heoa yemoa wavra vovhueinvrava, wo os yimba undwonamba avav. He miva dasna nonindmba, nomba temba si pulvovrava mindilva. Himba hev moalamangva wul-lahunv kuwulva pethanindnamba.

Himba pimba mindnam und vewol vev. Wo heta pimba kilumbshuawol vena hevna tovolna dahalna, wo pimba indkoklahui av. ⁶ Himba pimba wolasiha vena Sesoana nemeltindilm. Wo pimba Sesoana sembayang andranindilmsna av hena aralna. Pimba os uv, Yesus Kristusangas lohv keknamba yunalm huhmohnahonamba. Doata.

⁷ Nunglu, Yesusva prov tekonahonam. Indkumbiva si nunglivav hembra, eva himba nomba temba bunenamba lunamba hembra. Indkumbiva pethanindva si nunglivav hembra, wo si ningminivrava hembra, wo si wuovra hevmba pepehnahonam. Tanam honamba si os wohphovav. Doata. ⁸ Mendekliva Sesoava os ona, kava tamol eva brol. Ka honi anam, eva lohvm, eva si provavm. Kangas memba, manimani kanapopol vilov.

Yonmba Yesusm Nonglana.

⁹ Kava Yon, wo kava yena mongawa Kristusnindrini luhunv, wo noinda pivva manimani viv honamba, vei, kinm vralm, eva Sesoana nemeltindilm saivolm, eva heva

kivrawuliha vrelm owaiva. Kava wahra avna di Patmos wankuvundtholla, manara, kava numhowol vavovna, Sesoana moalamangnam alm, eva tanamolmom Yesusnam. ¹⁰ Mendeklina nambairava mingurava Sesoasongol kamba nihra vrevna, kava sis helle moalamangm mendeklim, os maim ona, vuv pieiv. ¹¹ Nomba moalamangva os opiavna, novol vewol veo nomoa, memba yimba nonglavpa, wo dembhanganga vungu vinvm tombaioa nooa no 7pelaram Kristusnindm hindm nom, hindm nom indakonda, Evesuskotanindm, Smernakotanindm, Perkamumkotanindm, Taiatairakotanindm, Sartiskotanindm, Pilatelpiakotanindm, eva Laotisiakotanindm.

¹² Kava imharavhoanamba, nonglalm, an ishomnav kamba? Nonamba kava ona imharavhoana, kava nongla 7pelara lamputilm, golna vewol vina. ¹³ Kava nongla, mongova hovra lohvna no lamputilhovra, himba nomba snal maim ona, arana ombol. Himba kayen tokolna lohvna. Himba wulluhvna golna avondriniva hevna avondra. ¹⁴ Henamba kuva tamba sipsipna talmsna, os maim ovna, teko dombal. Henamba novpa ovna, suwemda tangu vev. ¹⁵ Henamba kemonglava ovna, hon boal, snal suwemba tavna, heva os owai, mindelva tavnomoa. Henamba moalamangva os uvna, ovna, pueumbwut ov. ¹⁶ Himba ilohvna 7pelara paiva hevna nihananglana. Nuveskol samblamulva ovlakasbonava pivi ahaiwo ahavna hena mengrava. Hembra os nunglivna, maim ovna, okomba doa hovra lohv, novpa sowaivwol vevna.

17 Nonamba kava ona nonglana, kamba os vendpena hena monglisra, os maim ona, mindilm vendpena. Wo himba hevna nihanasis engla holotho kaina, wo ona, ata ye pem vevav. Ka vei, tamol eva brol. 18 Kava noi, kamba dahana, heva os nonglo, kava wohavav osangas yunalm. Wo kav aiwo av kuntiva dahalnamba, eva vuhemba, temba indhanamindva avpa, osm hengava si kava os deuhtvav.

19 Novol vewol veo, memba yimba nonglavpa daipotava, eva mani si phovav sewonamba. 20 Men poitamona plalva nonamba 7pelarava painamba, nomba yimba temba nongaliva kana nihananglasisva, wo eva 7pelara lamputilm, temba yimba nongaliva. Nomba 7pelarava lamputilva, 7pelara Kristustindi, hind Kristusnind, hind Kristusnind. Nomba 7pelarava paiva lehwol viv ovsongolnindm no 7pelaram Kristusnindnam, hind Kristusnindm, hind Kristusnindm, hind Kristusnindm.

2

Evesus Kristusnindm.

1 Kristusva mendah ishongamnavna Yonmba. Novol vewol veno honaoa ovsongolnindrinim Kristusnindnam Evesusram. Temba himba nomba mongova ilohnamba 7pelarava paiva hevna nihanasisva, wo lohmana vungu vevna hovrahovra no 7pelara golna lamputilmusra, Kristusnindm kekalvho vewol vevna, omnana os yemba. 2 Kava nonora lohv, osva noi yimba viv. Yimba ehlana mindnam andra vev, wo yimba es eva kivrawuliha vrivra. Kava nonora, osva yimba

owai, puehalnindmba patvunvmoa. Yimba doa simbeihawol vina, nomba himba temba osva eishovnamba, kava moalamangnind, heva os tanamolnamba owai. Yimba saivunna doara, osva una, owai, himba ambo moakokonind. ³ Yea osangas kamo andra vaomana venavm. Yimba kinmba lavraomana vev kana nihilna, wo yimba owai, wuleihavmoa.

⁴ Heva os kava honindava yemba musk vinv, yimba doa bumbriskovna, keknam undalm velmba, nonamba temba seilmba pevpa amnanamba kamba. ⁵ Keknam henga ning, os pev ten nemet avnam. Weihaloh avramana veov pevna undm, wo vivm, os ten pev seilm doara vivnam. Yimba pevmba Weihaloh avramanamba owai vetava, ka si prunvav yemba. Kava si koholothunvav yenamba lamputilva, hevnavhorava owai. ⁶ Heva os diva nomba temba yimba vivnamba, temba yimba lehra vivna. Yimba ahnam indanam lovahvna, noindava temba nomba Nikolastatanamba vivnamba. Kava eva owai, ovunvta.

⁷ Indakonda indhana yea aongna hillivm, nom ten Sesoasongol ishunvm hind Kristusnindm, hind Kristusnindm, hind Kristusnindm indakonda.

Himba nomba kuvhoatava vuhemba Sesoaindava, kava si hembra wuhhovav, nelmba timovmba, no tilliniva, temba noindava undva vrapva, nonapopolmba almba yunalmba. Honamba timba loh men Sesoana osora.

Smerna Kristusnindm.

⁸ Kristusva mendah ishongamnavna Yonmba. Novol veno honaoa ovsongolnindrinim Kristusnindnam Smernanindram, mongo henoita brol eva tamol, yemba honam ishunna. Himba noi dahanamba, wo henga hevnatovna beswonam pho. ⁹ Kava nonora lohv yenanamba kinmba. Kava nonora, osva yimba owousra av, heva os owai, yimba bimbsnind av kana novrava. Kava nonora lohv nomba sahoklalva, indhanamba yemba nomba eishunvpa. Himba os eishov, kava Yutanindnonoa Sesoanindnonoa, wo heva os owai himba Sesoanindva. Himba puehalnindilm av Setanna. ¹⁰ Manam yimba pemba vivav, osva ora, es hevpa si kamba vinvav? Hillu, yem ka ishunv, Setanmba si monglamba yemba wolasiha vevav wahra, yem lehwolalm. Yimba si saha vrowovav, nomba os okombava yemba 10pelara pieloh vungamnavav. Heva os keknam undnahonam ao, eva yemba dahavra. Yimba keknamba allava, kava si yemba daswolvav topi moainal. Memba osm, yimba doa kuvhoai Sesoana vuhemba.

¹¹ Indkumbioa indhanaoa aongna avm, hillivm, nomoa memba Sesoasongolva ishunvpa Kristusnindmba vavawonamba.

Himba nomba keknamba allava, eva hembra dahavra, himba os vravav vuhe besalva, osmba hengava kiliva dahalmba si indkokla vevavmoa. Memba osm himba si suwekembellamba gavavmoa.

Perkamumna Kristusnindm

¹² Kristusva mendah ishongamnavna Yonmba. Novol veno honaoa ovsongolnindrinim

Kristusnindnam Perkamumnindram. Mongova aiwolohv nuveskol ovlakasbonamba, honam yemba ishunvra. ¹³ Kava nonora lohv, yimba hi aevulv. Yimba men av, Setanna vuhe men lohvm, wo indhanamba hem engiv. Heva os owai, yimba tanam kalmangas wohav. Yimba sambla undva verombtvmoa, ishunilmba pevna almba keknamba kaindamba, eva nonamba himba Antipasmba helvakomandhinamba yena novrava. Antipasva kana moamba ambarava levraholothovnamba, hembra helvakomandhina yena kotara, noindava mendah Setanmba woheinv.

¹⁴ Heva os kava men monglava ilohv, yemba ovunilmba nomba, yimba ten monglava lohav. Yimba engiv Balamna wevsam. Balam doara numhana Balakmba, osmba os vinvm Israelnindmoa, sahonamoa almoa. Himba indkoklava honinda vivna, inne noi hlavnam, ten nona sembayang vinvnam tihsongom, eva ongariskui noi vivnam. ¹⁵ Eva osangasta monglava ten yimba wonlovahvta, himba engiv gekalamomba Nikolastatananam. ¹⁶ Wou, weihaloh vewol viu pevna undm. Yimba owai vitava, kava si prunvav yeindamba lelnam, wo helvawol vevra yemba no ovlakasbonanamsna, phovra kavna mengmerini.

¹⁷ Indkumbioa yeoa aongna hillivm, nomoa memba Sesoasongolva ishunvpa Kristusnindmba vavawonamba.

Himba nomba kuvhoatava vuhemba Sesoaindava, kava si daswolvav moainal inne rotinanihna hembra indkumbimba, os ningthiv, mana, wo mendah poaita komalohv. Ka vera, vrahora hem, hon dombal nonahonam, nemel nihilva novol

velohvra nosrava. Owai, mongova lihavavmoa honamba nemelva nihilva, henongas henoi honi vravavm.

Taiatairana Kristusnindm.

¹⁸ Kristusva mendah ishongamnavna Yonmba. Novol veno honaoa ovsongolnindrinim Kristusnindnam Taiatairanindram. Ombolva Sesoanamba os ona, hengas lohv novnamba, osva maim ui, mindel suwena, wo kemonglava nehramohrava vevpa, maim ov, olna govhoawol vivna. Himba ishunv honam yemba. ¹⁹ Kava nonora lohv, nomba temba yimba viwul vevpa. Kava nonora luhunv yena wavrakolamba osva henom, henom, yena keknam undnahonam alm, yena kolvrandramba henom, henom Kristusnindm, wo eva yimba es eva kivrawuliha vrvira. Kava nonora, osva yimba viwul vev mindnam daipotava, osva temba seilva nemetva pevpa vivnamba espetava.

²⁰ Wo heva os kava honamba yemba ovinv, yimba nomba ungevlirinikoklamba nombolvhoalohv, nomba temba himba velmba vevpa. Himba os ovna, kava moashulnind unguvlirini av. Heva os himba kanamba indhanamba indamonam deisumbisihav mongona monam hevna moaram. Hev deisumbi aisihav vev ongariskuirava, hlalmba innemba, nomba temba nonamba tihsongomba sembayang velvohinvpa. Ungevlirinikoklava Yesepelva doarava os vewol vevna.

²¹ Kava doa ollana, osmba pevna undm weihaloh vretok, wo meishanam pilpiango pevna sahaposwomoa. Heva os owai,

himba nengvnamoa, weihaloh vrelmba hevmba. ²² Hillu, kava si pilpiapahavav hembra vuhekoklarava, uvavulvuheram, wo himba nomba temba tlatrinimba kekaiv vivpa hemongova, henomba si mendekli kinmba dumbvav. Kava honomba si daipota vevav, himba nomba henga weihaloh avramanamba owai vetava hevna sahaposworiniva.

²³ Ka vera, si helvakomo venara hena an-dranindm. Wo annind annind indkumbiva si os nunglivav, kangas nonorava lohv, osva indhanamba vei, os vewol viv, eva os nengwol viv. Wo kava si esesm yemba vinvav, osva temba yimba nomba vinamba.

²⁴ Heva os yimba indkumbiva Taiatairanindva owai, hena moamba engminivnamoa. Yimba pevmba numhowol vivnamoa, levrapialmba, nomba temba osva alvpa, Setanna merini moainal poaita und. Men honam kava yemba ishalm vinv, kava si hengava mongova kinmba yemba holothunvavmoa. ²⁵ Osangas wohviluwulkovvm Sesoamomoa, nonamba temba yemba numhowol vinamba, verava, kav provavm.

²⁶ Kava si kekaiv vevav eusmonamsna yemba indakonda, himba nomba kuvhoatava vuhemba Sesoaindava, wo osangas eunillamoa vevm, nomoa temba kava osva nengvrava. Wo henoi si he kuwulalmba wulluhunvav mongnindnamba.

²⁷ Himba si kekaiv vevav hembra, wo owai, wavrava si luhunvavmoa. Himba si powalwolvav hembra eskand eskand, maim

ora pethablanga. Noinda himba si keknam
wohluhunvra kuwulalm. *Buk Song 2:9*

28 Memba honamba eusmonamsnamba, kava
kovovrana arana. Kava si osoa vrahovav
hembra. Wo osoa ka vera, vrahora hulvundm,
memba osm, doa vuhemba Sesoaindava
kuvhoai. 29 Indkumbioa heoa nomba aongnamba
hillivm, nomoa memba moamba Sesoasongolva
ishunvrava osva hind Kristusnindm, hind
Kristusnindm, hind Kristusnindm indakondava.

3

Sartisna Kristusnindm.

1 Kristusva mendah ishongamnavna Yonmba.
Novol veno honaoa ovsongolnindrinim Kristus-
nindnam Sartisram. Himba nomba mongova
ilohvta Sesoasongolva, 7pelarava painahonamba,
honi yemba ishunvra. Kava nonora lohv, osva
manimani yimba viwul vevpa. Indhanamba
yemba os unvra, yimba av, heva os tanam doa
yemba wohsihana. Memba os, yimba men-
dah kamba engivmoa. 2 Phosoho, yeoa kekn-
am ovhoapro honanamo, memba mendahva
lohvpa, wo si os wohsihavavmoa yunalmba.
Kava nonglav, os manimani yimba memba viwul
vevpa, owai beswonamba lehrava kana Sesoana
novrava. 3 Wo noinda osva manam yimba
maikumi vivra besalnelmomba, nomba temba
yimba dumbvnamba, hillivnamba, wohengivm
nom. Weihaloh vewol viu pevna undm, alm
nonam. Yeoa novkaka eivvm, kava si prunvav
yeindamba, kinm plothunilm, vekingil vruwul
vevra, yimba os maim uvra, yukovnindrini. Wo

yimba si ningvavmoa, osva henanam kava si provav yem.

⁴ Heva os yimba monglava ten aevulv Sartisrava, himba hevmba popeng vewol vivna, nihvuhinhuimba almba. Himba si kamongo angavra, osm maim ovra, sehelnonoa. Himba si vewol vivra dombal pikianmba, manara himba besal. ⁵ Himba nomba kuvhoatava vuhemba Sesoaindava, si vewol vevav dombal pikianmba, oshev ten noi. Kava si poswol vinvavmoa hena nihilva Sesoana tombairiniva, temba noindava kilihavpa, beswonamba yunalmba wohalmba. Kava si os ovav nomba, himba kana, Sesoana novra eva hevna ovsongolnindna novra. ⁶ Indkumbioa aongna hillivm, nomoa memba Sesoasongolva ishunvpa hindm hindm hindm Kristusnindmba vavawonamba.

Pilatelpiana Kristusnindm.

⁷ Kristusva mendah ishongamnavna Yonmba. Novol veno honaoa ovsongolnindrinim Kristusnindnam Pilatelpianindram. Mongova honamba himba Sesoamangas wohengv, hengas tanamolmomba ishov, himba ishunv honamba yemba. He wulav kuntiva Devitnamba. Memba osm, he wuleinv kuwulva. Nonamba himba velaihavrava mana vemamba, hengava es eva ata kolvovta, owai, os ambo wohvelaihalohvra. Wo hengava himba kolvovrava, es eva hengava ata velavhoavta? ⁸ Kava wiyera lohv manam manam, yimba temba viwul vevpa. Hillu, kava doa tuvpa yemba velaihaklehinna pevna novra, wo an eva hengava kolvovav? Kava nonora lohv, yimba nihilhui mongona indhanahovrava. Heva os yimba

kana moam wohengiv. Wo yimba pemba vivmoa, kana nihilmba sevra ovralmba.

⁹ Ten lohv vuhekoklava nomba Setannamba, temba himba nomba avpa hona vuherava ishuv os, kava Yutanindnonoa Sesoanindnonoa, heva os owai, himba gekala uv. Himba Sesoanindva owai. Hillu, ka si weihaloh vewol vevav hembra, ambinilm yena novram, wo ku kusithapramana vevra yena monglasra. Himba si os nunglivav, osva kava doa yemba und vewol vev. ¹⁰ Yimba doa engivna kana moamba, noinda yimba doa kivrawuliha vrinamoa. Wo noinda osva kava si yemba wonavra nonamba lehwolalmba, nomba temba si prunvavpa indkumbimba hona pethanindmba. Honamba lehwolalmba si lehwol vevra henom, men avm henoi pethara.

¹¹ Kava ten prov, osangas wohavm, pev men daipota avm. Wo an eva si dembhanga vinvav yenamba topi kuriniva, nonamba kanothowol vevpa, osmba memba kalm.

¹² Kava si venavav, mongova henomba kuvhoatava vuhemba Sesoaindava, kava si hem nomba lothovav hovmundilmsna tempelmerava kana Sesoanamba. Himba si owai, wohwuleihavavmoa. Kava si novol vewol vevav heinda nihilmba kavna Sesoanamba, eva nihilm kotanam kavna Sesoanam. Memba kotava honamba nemel Yerusalem. Himba holopev senakembellini kana Sesoana. Wo kava si eva novol vevav heindava kavna nemel nihilmba. ¹³ Henoi henoi indakonda indhana yeoa aongna hillu, nomoa temba Sesoasongolva ishunvpa hindm hindm hindm Kristusnindmba vavawonamba.

Laotisiana Kristusnindm.

14 Kristusva mendah ishongamnavna Yonmba. Novol veno honaoa ovsongolnindrinim Kristusnindnam dom Laotisianindram. Himba nomba mongova Sesoa aramangas engv, wo hevna aralna moamangas levraholothov, he plalva, manimani memba Sesoava venamba. Himba ishunv honam yemba.

15 Kava wiyera lohv, nomba manimani temba yimba viwul vevpa. Yemba owai, vuvrowol vevmoa, tepepa vilovmoa. Memba osm yenamba keknamba undnahonamba almba doa tombseihinv. Kava osm vev, os yemba vuvrowol vev, ora tepepa vilov.

16 Noinda kava doa plasra einv, mengongo vinilm yem kavna mengmerinim. 17 Yimba eishov, os kava bimbsnind. Yimba os ningv, kava doa phovhoana bimbstowondalm, wo owai, hengava ningvmoa mana vemamba. Heva os yimba owai, levrapivolvmoa, osmba kava tanamolnam snakolal, aivokolal, innehuinindrini, novtitmungil, nihpus.

18 Ka ishunv yem, kanamini golm sovawol viu, golva nomba vewol vina suwenangas, osm besal. Wo yimba osva tanam wohavav bimbsnind kana novrava. Sovawol vivm kanamini pikianoa nooa dombalao. Wo yimba os pevna loutovmba nihpusnamba hehla vewol vivra. Sovawol viu kanamini obatoa pevna novmoa nonamoia selvowolalmoa. Wo os yimba tanamba beswonamba novpa vivra.

19 Kava sishona vewol ovov, wo hukum vewol vev, nomba kava und vewol vevpa. Wo noinda osva keknamangas vivm besalwevsamoia,

beswonam weihaloh vewol vivm pevna undm, alm nonam. ²⁰Hillu, men kava, kava tuvrava lohv, wo vendawov tuvum. Mongova helletava kana moalamangmba, wo tuvpa velavhoatava, kava si siharava, inne nevro hei. Wo himba si kai nevro.

²¹Himba nomba vuhemba kuvhoatava Sesoin-dava, kava hembra wuhhovav, kavna vuheram waialm. Manara, kava doa kuvhoana vuhemba, wo ahav mongawulm kavna arai hena vuhera.

²²Yeo indkumbioa aongna hillivm, osvora, es Sesoasongolva ishuv hindm nom, hindm nom, hindm nom, Kristusnindmba vavawonamba.

4

Yonmba Nonglana Sesoana Kembelmba Inung-punungramsna.

¹Sisimba kava ona nonglana, wo diva nomba velaiha endvna tuvpa senakembelliniva. Wo kav hellevna moalamangm, nom ten ishomnanam kam doara. Snal moalamangva, nomba ophovna vuvmsna. Nomba moalamangrava os ophovna, pro, vongao hom, wo kava ata indthoamnavav yemba, osmba mani si phovav sewonamba. ²Wo noinda Sesoasongolva nihrava vrevna kamba lilnam. Pai, diva vuhemba lohvnata senakembellava, king kuwulna vuhemba. Mongo indhanarini di avna vuhesra. ³Temba himba nomba avnamba no vuhesrava, snal ovna, elhon av, hevum snal besal, vena, vei aembulnonoa eva tevlapihanalnonoa. Mindva weisming vrelohvna no vuhemba tevlapihananalna.

⁴Vuhemba monglava 24pelarava nomba eilungutho velohmanavna. Diva noindava

24pelara kuwulva ovsongolnindva lovahvna, no 24 pelara vuhesra aevulvna. Nomba kuwulva vevrana pikianmba dombal, wo himba topiva golna hohloprana. ⁵Wing pihavnamba, hulaikala no vuherini vevna. No vuherava di mura lampuva 7pelara telowovna. Nomba lampuva lihvna Sesoasongolm. ⁶Wo eva di novlomossis no vuherava lohvna mana vemava snamba wanplomb glasmsna, glasva nomba ambo dendovna.

No vuhepethallava mongnasis mongnasis di ovsongolnindva moainal Sesoana lovahvna 4pelara doara. Nomba ovsongolnindva 4pelara novangas nihmba lehra vethaprinna, vevna, misis lovahinvna, eva meissis lovahinvna. ⁷Nomba mimiriniva ovsongolnindriniva snatovna, ovna laion. Nomba pethamnalva snal maim ona, sapi aral menda-hal. Wo hovrinina novlomosva ovna, indhanarinina. Wo eunilliniva snal, ovna hultuwa dalohvovra. ⁸Honamba indakondava ovsongolnindnamba 4pelanamba, anglalva 6pelara luhungu vinvna. Wo novangas hembra wohehlathaprowol vena yunalm, venamba, anglalsingi, osangas. Sia okomba himba owai, wuleihivnamoa uvuvulmba, osva, Windel, windel, windel, hev mendekli Sesoava hevnapopolnonoa. Hev avnam, hev lohvm, wo himba si provavm.

⁹Honamba ovsongolnindva novnamba, himba Sesoam okulivna, hem nomba, temba himba avpa no vuhesrava, os huhmohva yenamba besalnonoa. Wo eva nihilva yenamba mendekli sena wohlohv. Yemba kava os umniv, yimba lehra. Yimba memba noi, wohav yunalm osangas.

10 Wo nonam nonam nomba kuwulva ovsongolnindva 24pelarava mulumbdandna olvotham-nana novlomossis hembra, temba himba avpa no vuhesrava king kuwulna. Himba okulivna sem-bayangna hembra, himba wohav osangas yunalm.

Nonamba himba hembra okulivnamba, himba dembhapuv vevna hevna topiva kuriniva vuhera murapefa, wo uvna,

11 Pina mendekli eva Sesoa, kava yemba okuliv, os huhmohva yenamba besalnonoa. Nihilva yenamba mendekli sena wohlohv. Yimba keknamangas av, manara yimba manam manam wohvena. Manimani wohphongas vena, wo os vena, noinda yimba indva os vrevna.

5

1 Wo kava nonglana tombaim dindvelva nihanasis henoina, ten avnam vuhera. No tombairava doara novol velohvna, vena, mongnasis, eva mongnasis. Tinennamsna 7pelarava sithawol vungalohvna no tombairava, si homeis pevhoawolv. 2

2 Wo kava nonglana andrasowolm ovsongolnindrinim. Himba ishovna vevandnam moamba, an besalva, tongovorombol velmba nomba tinenmba, wo pevhoawolvav nomba dindvelva tokolva tombaiva os? 3

3 Heva os owai, mongova senakembellava huiva petharava eva pethamerava, an eva besalva lohv, pevhoawolalmba dindvelva tokolva tombaiva, wo an eva nov vesiha vevav? 4

4 Kava wena avna, wenopva kanamba esvema pihavna, noinda snamba mongova owai, an eva besalva,

pevhoalmba dindvelmba tokolva tombaiva, eva nonglalm meram?

⁵ Heva os mongo noi ovsongolnindrini kuwullini omnana kamba, hello, manam yimba wovevav, laionmba Yutatindiriniva doa wohkuvhoana vuhemba. Himba Devittindirini lohv. Noinda himba besar, pevhoawolalmba nomba dindvelva tombaiva, eva nom 7pelaram tinenm.

Yonmba Nonglana Sipsip Otolmba.

⁶ Wo kava nonglana, sipsip otolva hovra lohvna no vuherava, no ovsongolnindva novnamba 4pelarava eilungung vrelohmanavna. Wo kuwulva eva eilungung velohmanavnata di. Nomba sipsip otolmba os nunglivna, ovna, doa miklie. Himba os ilohvna 7pelara kasalva eva 7pelara novpa. Nomba yunam Sesoasongol, temba wolaihapranamba hona petharamba vavawonamba. ⁷ Doa sipsip pronamba, vra nomba dindvelva tokolva tombaiva nihanasisriniva henonaminiva, temba avnamba vuherava.

⁸ Sismba himba vranamba dindvelva tokolva tombaiva, wo noi 4pelara ovsongolnindva novnamba, eva 24pelara kuwul ovsongolnindva ku kusithapramnana sipsip mendahalm. Henoi henoi indakonda wohwulluhpravna gitava. Wo eva hev vena, wulluhpravna pirin, pilivhoangu vevnamba tinen teteihnungna. Memba pirinmba, tinen teteihnungnamba, sembayangmoa Sesoatindinindna. ⁹ Wo himba indkumbiva ovuvrinnivna nemel sangalva sipsip mendahalm,

Yimba besalva, vralmba dindvelva tokolva tombaiva, wo eva pevhoalmba tinenmba. Manara, yemba doa helvakomandhina, wo tovol pevna dahallini yimba indhanamba kilumbshuawol venamba, wo himba Sesoana lovahv. Nom hindm hindm, eva indakonda moanam, eva snatovna snatovna, eva indkumbim pethanindm vavawonam. ¹⁰Yimba vrowol vena hembra, sembayang andranindilm Sesoanam pivnam. Noinda himba os lovahv, maim oi, king kuwul. Wo himba si moamba wulvahinvra petharava.

¹¹Wo kava nonglana, wo kava hillinvna moalamgm indkumbim ovsongolnindnam. Esvema lohvna, es eva ata seivilta. Himba di eilungung vrelohvna, vena, Sesoana vuhem, eva nom ovsongolnindm novnam 4pelaram, eva nom ovsongolnindm kuwulm 24pelaram. ¹²Wo indkumbiva eishovna moamba mindnam, Nomba sipsip otolva miklinamba, noinda himba besal, wo kava hembra okuliv. Himba keknamangas av, manimani besalva henangas, manam manam nowolva hengas wuluhv. Hengasta nihilva mendekliva wuluhv, hena nihilva okuliv.

¹³Wo kava hellevna manam manam, Sesoava nomba vewol venamba, vei, senakembellinim, petharinim, wanplombmerinim, eva pethamerinim. Kava helwolvna manam manam vavawonam, uvna, Indkumbi okolowol velvohra aral ombolmoa, eva undnahonam popeng verumbvra hemoa, manara, hengasta mendekliva nihilva ahai

elohv, hena nihilva aiwo vulinv. Himba keknamangas ahav yunalm yunalm, henomoa temba himba avpa vuhesrava, eva sipsip mendahalm.

¹⁴ Wo no 4pelarava ovsongolnindva novnamba uvna, tanamta, wo ovsongolnindva kuwulva 24pelarava ku kusithapranamba, wo sembayang vivna.

6

Sipsip Mendahalva Tinen Mongasal Tongova Vravna, Noi Ten 7 Pelarava Sithawol Vungalohvnam.

¹ Wo kava nongla wulluhvna, nonamba sipsip mendahalva tongova vravnamba mimirinim nom 7pelaram tinenm. Kava hellevna, mongom nom herinim, ovsongolnindm 4pelarini ishovna, os maim ovna, hulaikala ov. Os ishovna, pro, mana vemava doarava novol velohvpa tombairava, osoa phovra. ² Wo kava nonglavna, diva miva dombal hosva lohvna. Indhanariniva noindava lohmana vevnamba, valgo iavna, wo hembra vreuhvna topi kuwulna. Wo himba os gana daosramba ungrundamba. Himba gana, mueh velmba.

³ Wo sipsippa henga mongom tongova vravna tinenm. Wo kava hellevna, henga mongom, nom herinim, ovsongolnindm 4pelarini, os ovna, pro. ⁴ Wo henga mongo phona hos. Honamba memba aembul hosva. Indhanariniva nomba noindava lohmana vevnamba, hembra moamba kovoreuhna, pethanindmba indkokla vewolalmba, osm indhanamba owalmba

helvakomo vivra. Wo hem vena, vreuhna mendekli ovlakasbona.

⁵ Wo sipsippa tongova vravna henga mongom tinenm. Wo kava helle henga, mongom nom herinim, ovsongolnindm 4pelarinim. Himba ishovna, ona, pro. Wo kava nonglana, diva miva kaindava lohvena sumul hosva. No indhanariniva temba no hosnamba lohmana velohvnamba, himba wulluhvna besi, innemba nolhramba dombolmba, nonamba lukmangthallava avnamba.

⁶ Wo kava mana vemawitva os hellevna, ovna indhanana moalamang. Nomini phunvna, ten noi ovsongolnindva 4pelara lovahvnam. Nomba moalamangva os ovna, yeoa garava, pevna andra vevm, osm indhanaoa ponda ara. Wo noinda osva diva maketrava mindnam vongav. Innepetava eusil, diva esvema vongamnav. Wo heva os manam yimba denwitmba indkokla vewol vevav, wain, oliv, nomba aiv mengnam hlawuvolm.

⁷ Wo sipsip otolva henga mongom tongova vravna tinenm. Wo kava hellevna henga nom mongom herinim ovsongolnindm 4pelarini, ovna, pro. ⁸ Kava nonglana, diva miva kaindava worakakal hosva lohvena, indhanariniva nomba temba nosrava lohmana velohvnamba, henamba nihilva Daha. Wo no vuherava mindva sihavpa, Dahamba sis engprav. Eva hembra moamba dombtreihunna, indhanamba helvakomo evelm petharam. Si vewol vewuvmona everava, mongova di dahavav, samblamongova si lovahvav. Honamba si nona vinvra, daosna, owousna, uvavulkoklana, sungeittatanana.

⁹ Wo sipsip otolva henga mongom tongova

vravna tinenm, wo kava nongalna di indsongolva alta sengsingi senakembella. Himba noi indsongolva, ten hem helvakomo vinam, noinda himba Sesoana moamba undnahonam keknam wulvahvnam, eva eishovnam. Noinda hembra helvakomo vilangavna. ¹⁰ Honi indsongol vevandwonam eishovnam,

Sesoa, yimba kuwul mendekli wulluhunv. Yimba windelangas, yimba pevna moamangas wohengv. Henanam si verava, yimba helmhola vewol vevav indhanamba pethanindmba, wo esesmba vewol vevra, nomba temba kamba helvakomo vivnamba?

¹¹ Wo nomba indsongova os henoi henoi, deiswulna hembra dombal pikian tokol. Hembra unna, dawonam euvvm tokwonapetam. Verava, pevna mongawa andranind, himba sembayang vinivm Kristusm, boasna hemsna helvakomo vipieirava, os yem ten helvakomo vivnam. Yea dawonam euvvm, verava, noi boasna lohohvhoara, ten Sesoa hev kiki vewol venam, dalalm. Doa os Sesoava si yenamba tovolmba lomohinvav esesmba.

¹² Kava mendah di wohlohvna, nonamba sippa tongova vravna tinenmba mongova. Nonamba diva esvema mendekli nenvpa kekaiv vena. Okombava suwihil nilhana, malo suwihilmsna. Weisva aembulalm nilhana, snal ovna, tovol.

¹³ Paiva ovriniva velaral vevna, os fikmov pundel holaral vev tillini, nonam vuvi vendvm. ¹⁴ Ovpa ambo heva hev hoai vena. Heva hev dindvena ambo hevm tikarmsna. Wo manimani olo wankokondvulpetha nominiva kihgavna, henga

mongnahalm mongnashara indamonam.

¹⁵ Wo indhanamba kithayna mella eva hon-
mera olopethalla. Diva noi vevna, king kuwul
pethanindna, duang, valgonindna kuwul, bimb-
snind, eva mendekli indhana. Indkumbi om-
bandhana andranind, eva ombandhana, noi ten
ambo avnam kuwulhui, indhanamba vevna, kok-
mondha vewol vivna hevmba. ¹⁶ Hev unvna olom
eva honm, piheinu kam. Ehlathawol viu kam
henona novlomossoa, wo himba temba avpa
hevna vuherava. Kam komao hena wusprollinoa
sipsipnaoa. ¹⁷ Manara, nambaikoklava mendekli
doa prunna hena wusprunilmba. An eva moih
ovovta, ovunilmba hembra?

7

*144,000Pelara Israelnindva Mara Os
Khuapranama Hevmba Sesoana Moanamba.*

¹ Sismba kava nongalvna sambblasambla
ovsongolnindm, lovahliangavna pethamulla
pethara. Himba vuvim olla numthuvna,
dalohvnamba pethara wanplombra eva tira
sena. ² Wo kava henga mongom nonglavna
ovsongolnindrinim, okomba pholsisrini provna.
Honamba ovsongolnindriniva wulluhvna
mana vema hevna englana, indhanam
kulohowolalm nonam, osm memba Sesoana,
nomba temba wohavpa osangasva. Wo doa hev
mindnam ishonga vinna nom sambblasamblam
ovsongolnindm. Memba noi sambblasamblava
ovsongolnindva, ten Seso doara vinnam,
daswolnam moamba, indkokla vrowolalm
petham eva wanplombm. ³ Hev unna no

sambblasambla ovsongolnindm, aembu, owai, ata ye lelnam indkokla vrowol vivav pethana wanplombna tinam. Indhanam boasna pioa saihawol vilangini, nom ten henoi andra vinivm pivna Sesoam. Pioa hemoa saihawol vilangini hevna mira. ⁴ Wo kava hellena, esvema indhanamba kulohowol vina. Mara os lohnama 144,000pelara. Himba os nomini nomini indakonda tindinind, indhanamba nomba Israelnindva.

⁵ Yutatindinindva 12,000pelara kulohowol vina,

Rupentindinindva 12,000pelara,

Gattindinindva 12,000pelara,

⁶ Asertindinindva 12,000pelara,

Naptalitindinindva 12,000pelara,

Manasetindinindva 12,000pelara,

⁷ Simeontindinindva 12,000pelara,

Livaitindinindva 12,000pelara,

Isakatindinindva 12,000pelara,

⁸ Sepuluntindinindva 12,000pelara,

Yoseptindinindva 12,000pelara,

Bensamintindinindva 12,000pelara.

Honamba indhanamba kulohowol vina, osm memba Sesoana hevna.

Esvema Plombmsna Livna Indhanamba, Sem-bayang Vewuvmona Venalmba Sesoamba.

⁹ Wo kava ona nonglana, pai, doa plombmsna lithav indhanamba esvema. Os i, esvema indhanamba, ova owai, ata an eva sevelta hembra. Himba indakonda os hind, hind, hind, eva indakonda moana, eva snatovna snatovna, eva indkumbi pethanind vavawonam. Himba di pu-

lundthoawolvna, vevna, vuhepethalla eva sipsip pethalla. Himba vevravna dombal pikianmba tokol, wo wevtisravla noi wulluhpravna hevna englanamba. ¹⁰ Himba mindnam vevandnam umnivna, os pina Sesoa, himba senavuhherava av, eva sipsip otol, hesamblangas pimba lopshawol evena.

¹¹ Ovsongolnindva indkumbi pulningewol velohvna vuhepethalla, di ten ovsongolnindva novnamba 4pelarava lovahvna, eva ovsongolnindkuwul 24pelara lovahvna. Wo indkumbiva mulumbdandna lohvoapramnana vuhesis, wo os sembayang vinivna Sesoamba. ¹² Himba una, Tanam, lehra pimba okuliv, eva pioa indk vethalohmanara pivna Sesoam. Manara, himba huhmohna, nowolna nonahonam av. Himba keknasowolangas wohav, nihilva henamba mendekli wohlohv sena, noinda pimba hembra okuliv.

Honamba Indhanamba Doa Vi Vovhoaprai No Kindiniva.

¹³ Wo mongo kuwullini ovsongolnindrini osahmanavna kam, anmund temba sna indhanamba dombal pikiannamba? Henamini himba pepravena? ¹⁴ Ka ophona, mendekli, kava tit vev, yimba nonora lohv, annind himba. Wo no kuwul ona, Hona indhanamba memba himba kinm lopsho vruwuvmona vevna, nomini phosohna. Himba poswol vina hevna pikian tokolva sipsip otolna tovolnana. Wo daipotava nemel dombalangas. ¹⁵ Wo doa himba mi lovahv Sesoana novlomosra. Himba sembayangmba

Sesoamba velvohmanavpa sia okomba hevna tempelduvmera. Wo himba nomba temba vuherava avpa, si kokmondha vewol vevra hembra. ¹⁶ Wo no indhanamba si hengava ponmba vinvavmoa. Hembra si hengava popihava vinvavmoa. Okombasowava si hembra vinvavmoa. Owai, vuvrowol vevav, mani eva suwemba telolmba hembra. ¹⁷ Manara, sipsip otolva hovrahovra lohv vuherava, himba si luhunvav kekalvhonindrinimsna. Himba si deisumbi-ngavra, dom pomellam, ten po puthovhoangu vevm, pomba noi ten nonapopol yunalm avm. Wo Sesoava si poswol vungeinvav yunalm wenopva hena novriniva, hengava wenopva si pruwunvavmoa.

8

Tinenmba Eunilliniva Honi Tongova Vrana.

¹ Sipsip otol tongova vpravna eunillini tinenmba, wo nonamba poaita wohhilivhoana senakembellava dawonam ambo ² Wo kava nonam nongalna 7pelaramba ovsongolnindmba, himba loh vahvna Sesoana novlomossis. Hembra dembrehunvna 7pelara vuvpa, indhanam osm unvna, doa mana vemakoklava men phov.

³ Mongova ovsongolnindriniva pronamba, di murapeta lohvna sengra tinensowarini. Nomba ovsongolnindriniva wulluhvna pirin tinensowarini, nomba golna vina. Himba mindnam dombvna tinenmba, Sesoam sembayangnahonam sengmanalm. Nomba sembayangmba, Sesoatindina. Wo himba

hohlona honamba tinenmba golsengra vuhesis.
4 Wo nomba tinensuwulva ovsongolnindrinina englasrini vongavna Sesoaindamba. Eva Sesoatindina sembayangmba os vongavnata nonahonam. 5 Wo ovsongolnindriniva songowol vevna no pirinda suwemba nomini sengrini, wo os vetpipahana petharamba pirinnahonam. Wo di galoh ve mindel, wing pihavnamba, hulaikala pihavnamba, wo nenv esvema di vevnam.

4 Pelara Ovsongolnindva Vuvm 4 Pelaram Owl Vivna.

6 7Pelara ovsongolnindva himba ilvahvna 7pelara vuvpa, owlalmangas. Doa himba mengra lothoprai. 7 Doa mimirinisna hesna opia, wo pomba os nilhavna honmsna, os ningthiv, ais. Wo aisva, suwe, tovolnahonam moakot venamba, sovhopena petharam. Wo pethava mongnasisva doa wohtapena suwera tinahonam. Mongnahalva mendah khui elohv. Wo manimani ilva ilsowanahonam wohtapena suwera.

8 Wo henga mongo ovsongolnindrini hevna vuv pia, wo mana vemava snamba, ona olo, suwe telahavna, venamba, vetpena wanplombra. Wo venamba, wanplombva mongnasisva doa tovolalm nilhana, mongnahalva khui beswonam ihilwolv. 9 Wo mongnasisva manimani wanmeriniva os muisowa vena, mongnahalva beswonam luhungu vev. Wo monglava sippa di indkokla vilona, mongnahalva beswonam diaka vev.

10 Wo henga mongo noi ovsongolnindrini onam hevna vuv. Wo hulvundkumbiva pisi, wohana woklamsna pusamba vethavna, velapena

petharam. Di velapena pora, tovalpra. ¹¹ Nomba hulvundkumbimba os ningthiv, Thanapo. Wo nomba pomba mongnasisva wohnilhaprana thapolm. Mongnasisva beswonam lingana. Mindnam indhanamba sihavna nominiva, temba hlavnamba pomba nomba thapova.

¹² Wo henga mongo ovsongolnindrini hevna vuv pia. Wo okombava mongnasisva, weisva mongnasisva, paiva mongnasisva, vuthundawol vina, sim kilvialm. Wo mongnasisva beswonam lovhoangavna.

¹³ Nonamba kava mendah nongla wulluhvna, wo kava hellevongo vevna, ona, hulva mepeh sena ovra oindalohv. Wo nomba hulva mindnam moamba opiavna os i, wavro, wavro, wavro, hindm nom, men pethara avm. Henga samblamong ovsongolnindva hevna vuvm winelm vev, kinmba mendekliva si nonam plothunvav indhanamba.

9

Henga Mongo Ovsongolnindrini Hevna Vuv Opiana.

¹ Wo no mongo ovsongolnindrini pia vuv hevna. Wo kava nonglana, paim ovrini velapevna petharam. Nomba paiva vreuhna kuntiva dom hivemam, ten mel pilpiapahalohvnam endalhuiram.

² Wo os velavhoana mel endalhuimba. Suwulva nomini phovna mellini, os maim ovna, ososowasuwul phov. Wo vena, okombam eva ovm sia wohkovoningewolvna, noinda suwulva phovna mellini.

³ Wo koaimilumbva pihipiavna petharamba no

suwulmerini. Himba helvawol vivna, os ovna, saonoko. ⁴ Wo hembra ishunna, manam yimba ilmba indkokla vewol vivra huiva petharava, eva timba. Yeoa indkokla vewol vivm indhanamangas, henom, ten nis avnam, Sesoanapulhui ten lovahvm. ⁵ Honamba koaimilumbmba doa moamba vreihunna, nihsesoa vrowolalmba indhanamba, 5pelara weisva khuawol vilunvav. Wo heva os owai, moamba vreihunnamoa, indhanarinimba helvakomandhalmba mongomba. Ambo noi vinvra, nihind lilga, os ovna, nihsesoa saonokora ten vewol vevm. ⁶ Nonamba indhanamba si aslavlav monamba, dalalmba, heva os himba si nunglivavmoa. Himba nonamba si ningvra, dalalmangas, heva os owai.

⁷ Nomba koaimilumbva snal, ovna hos prapiav daosram. Hevna kurava himba vevravna mana vemava snal goitopi. Wo hena novlomosva snal, ovna indhanarinina. ⁸ Henamba tamba snal, ovna ungevlinirina, wo lomba henamba snal, ovna laionna lo. ⁹ Henamba avondrava, besi daosrinimsna tongovapa veluhunvna. Henamba anglalwutva os daheinvna, ovna, mindnam hosna karisnamba vengipiev daosram.

¹⁰ Nomba koaimilumbna evnditva lolna, snal, saonoko nona ten helvawol vivm. Himba moamba ilvahvna, indkokla vewolalm indhanam, 5pelara weisva khuawol vilunvav, di luhungu vinv hevna evditra. ¹¹ No koaimilumbnamba king kuwulva luhunv, himba tihsongol mongo mel endalhuirini. Henamba nihilva Hipru moanamba os sevriv, Apaton. Wo eva Griknindna moanamba henamba nihilva

os sevriv, Apolion, memba osm uv, indhanam indkokla vewolalm.

Henga Mongo Ovsongolnindrini Hevna Vuv Opiana.

¹² Doa mimiriniva kinmba mendekliva ihkohona. Wo hillu, henga mendah samblava kinmba si epravav. ¹³ Wo henga mongo ovsongolnindrini piana hevna vuv. Wo kava hellevna moalamangm, engpravna no golna sengm, ten lohvnam Sesoana novra. Nomba sengrava angolalva 4pelara lovahvna kasalnahonam. Wo nomba weitva kava hellevnamba, no kasalshara provna.

¹⁴ Nomba moalamangva os omnavna nom mongom ovsongolnindrinim, nomba temba vuvpa wulluhvpa, wolanga veo nomoa 4pelaramoa ovsongolnindmoa, temba hembra bui vewol vinamba mendekli po Yupretisrava. ¹⁵ Wo himba hembra wolapho vena nonamangas, ten Sesoa hev doara nengnam. Osm henga himba helvakomo vivra indhanamba, ten pethara avm. Wo indhanamba pulundthoawol vina, os vena, mongo mongo mongo. Os wohwangtumbulahana hembra mongnasimba, mongnasisva ahawolvna beswonam.

¹⁶ Kava hellevna, osva ona, os valgonindva hossrava avhoangai daosmba. Dihi mara os lohnama, 200 milion pelara. ¹⁷ Wo nomba manam manam kava nongalvna inungpunungramsna, hosm eva valgonindm. Venamba, ona, os snal himba vilov. Valgonindva avondrava besi daosrini tongovapa vivna. Wo nomba besiva os vevna, aembul, sembol, سوال, os kelkavho vrevna. Wo

kuva hosnamba snal vilunvna, ovna, laionna ku. Wo no hosna mengrava suwe tavna, suwul pukundtholohvna, honboal puthoapho vevna.

¹⁸ Wo pethanindmba mongnasisva wohindkokla vilona, manara hosna mengrini kinmba samblamongova phunna. ¹⁹ Wo no hosnamba pulva luhungu vinvna, di vevna, mengmera eva evditra. Wo henamba evditva snal vilunvna, ovna saihola kuwulnahonam, nonam engalalm, helvawolalm indhanam.

²⁰ Nomba ahawolvnamba beswonamba indhanamba hona petharava owai, sihavnamoahona sahoklal kindava. Wo heva os himba mendah weihaloh vewol vivnamoa hevmba, wo sungeipilalga vevnamoa, noindava temba hevpa vewol vivnamba hevna englanamba. Himba wuleihalmba uvnamoah, sembayang vewuvmona vinilmba tihsongomba, nomba temba indhanamba nengnamba weis vewol vivnamba golna, silvana, besina, honna, tina, wo honamba owai, es eva novvevav, es eva helwollava, lohmana vevra. ²¹ Hona indhanamba owai, weihaloh vewol vinamoah hevmba, wo sungeipilalga venamoah, hevna helvakomoriniva, pulnamba, wo ongariskui, yukovna owalna vreinvmam. Wo heva os owai, himba meisva hehara unvnamoah, nomba hengava velmba.

10

*Ovsongolnindrini Mongova Tombaiva
Wulluhvna.*

¹ Wo kava nongla wulluhvna mongom keknasowolva ovsongolnindrinim, holvopevna senakembellini. Hembra doa doara kovoningena

teko pikianmsna, wo osoa eva mindva kelathalothomnavna hevna kurava. Hevnamba novlomosva okombamsna venavna, wo henamba kemonglava suwumuhulmsna tawovna. ² Wo himba wulluhvna mongova tombaiva eusilva hevna englana. Doara doa pevhoalohvna. Himba kolvodathonga vena hevna nihanasis monglava wanplombram, wo hevna sihanasis monglava petharam meillam kolvodathonga vena. ³ Wo mindnam vevandnam velaiphowonam ona, laionmsna. Nonamba himba vevandnamba ishovnamba, hulaikalava 7pelara eishovna. ⁴ Nomba hulaikalava eishovnamba, wo kava venamba, ona novol vewol vevna plalva hulaikalanamba. Wo kava henga hellevna moalamangm senaminim. Nomba moamba os phovna, ata novol vewol vevav ye, nom ten 7pelara hulaikala eishovm. Wulao honaoa poaita.

⁵ Wo kava nomba ovsongolnindrinimba nonglavna, lohvena sena wanplombra, eva pethasra, luonamba hevna nihanasis engla senakembellam. ⁶ Himba moamba ohomokalthawolna, nihilva sevrana, henonam, ten wohavm, os owai, es eva vitivhoavav hembra. Himba noi, hengasta vena ovm, eva manam manam, ten lohvm ovra. He vena pethamba, wo manimani temba lohvpa eva nosrava, wo he vena wanplombmba, wo manimani temba merava lohvpa. Wo ovsongolnindrini ona, hengava si owai, pimba nengviluwuvavmoa Sesoamba.

⁷ Manara, ata ovsongolnindriniva eunilliniva hevna vuvpa piavav, wo Sesoava ata wohengvav hevna moamba doaraminimba. Memba Sesoana

nemelmoa besal, Sesoava ishunvnam hevna andranindm, nom moashulnindm. Honamba nemelmomba poaitava lohvna, wo daipotava ata wulphovav. Osm si sewonamba Sesoanindva beswonam wohavav.

⁸ Wo kava henga mongawamom hellevna senaminim. Nomba moamba kamba os omnavna, gao, wo vrao tombai dindvel eusiloa, ten peholotholohvm ovsongolnindrinina englisra. Honamba memba ovsongolnindriniva, noi ten sena lohvnam wanplombra eva pethara.

⁹ Wo kava ganamba ovsongolnindrini-inam, wo osahmanana hem, vrahalm kam eusil tombaim. Wo himba kamba os omnana, vrao tombaioa, wo neo mengna. Ata yena mengrava bes vevav yuhvpolsna, heva os yena emerava ata tha vevav. ¹⁰ Wo kava os vrana eusilva tombaiva ovsongolnindriniminiva, wo kava os wohvena, kana mengrava besva yuhvpolsna vevna. Wo kava nikivranamba, sismba kana emerava tha vevna. ¹¹ Wo kamba umnina, henga yeoa loho, moashulnindriniehm luhunu indhanam, annindm, indamonam eva king kuwulm, Sesoana nengavnangva os lohv, mani si hembra phunvav sewonamba.

11

Moashulnindrini Sambla, Himba Os Uhunna, Sesoana Lesvhoawolalmba Si Luhunvav Pethanindnamba.

¹ Wo os kamba vreuhna alamba lohohriniva, kamba omnana, garava, lohoh vewolo tempeldvm Sesoanam, eva alta sengm, wo sevelo, ora os indhanamba lohlohv, sembayang vewuvpa diva.

² Heva os manam yimba lohoh vevav peilmba ambarava tempelduvrava. Nomba lohvra. Doa nomba wulehinna indhanam, nom Yutanindna meisnindm oklanindm. Himba si no kotamba vaohothuvav, os verava, 42pelara weisva luhunvav. ³ Wo kava si daswolvav moamba nom kavna moashulnindrini samblam, kana moam wulelunvav, os verava, 1260pelara okombava evindhavav. Himba si huhmoh vewol evevav hevmba pikiankoklana, inethalm, osm indhanana silemba.

⁴ Honamba moashulnindrini samblava snal, maim ona, oliv denwit, wo snal maim ora, lamputilva sambla indtholohwolv Sesoana novlomossis, himba mendekli pethanindna. ⁵ Monglava indhanamba indkokla vewolalmba vitava hembra, suwemba si mengmerini phowolinvra, wo ungrundmba henamba noi helvakomo vinvra. Eva osoa himba nomba ningvrava, sahonamba vewolalmba hembra, si os dalvra hembra. ⁶ Hona indhanarini samblava ahai oholohv moamba, oholalmba ovmba, pomba hasvolmba. Himba honamba evevav, nonamba himba indhanamba moakus uhunvav, osva Sesoana lesvhoawolalmba si luhunvav yemba. Himba moamba wulelohv, pomba weihaloh vrelmba tovolalmba. Himba wulelohv moamba, wolapralmba manimani snanovna snanovna kinmba petharamba. Himba honamba evevav, os nonam nonam mindnam, osva hevpa enengvrava velmba.

⁷ Doa himba moamba nomba si ihisho epiendava, doa sungeittata mellini endalhuirini phovrava, helvawolvra, helvakomo velm.

⁸ Mindilva henamba di vendsongothunvav di mendeklikota monara. Nomba kotava os olhmonamba alvna, Sotom, eva Isip. Noi kotava memba, ten doara Yesus mendeklim di noinda helvakomandhinam.

⁹ Indhanamba si osva ningvramoa, singvewolalmba hembra, noinda indhanamba indkumbiva si nungluwulinvav mindilmba no indhanarini samblanamba, os verava, okombava 3pelara khuiva, eunumbul mongova. Indhanamba os snatovna snatovna, eva indakonda pethanind indakonda moana, hindtindi, himba si os nungeilvav. ¹⁰ Indhanamba memba avpa petharava si indk vithivav, noinda honamba sambla indhanamba doa endahawolna. Wo himba si vevra, tih lohvrava, inne nekaka vevrava, woh avroh evewolvra hevna sehelmongo. Himba si vivav honamba, noinda hona indhanarini samblava wuleprana mindnam kinwondava, hona pethanindramba memba avpa.

¹¹ Nomba 3pelarava okombava eva eunumbul vepiarava, Sesoava henga mengtovpa povsiha vewulinvra no indhanarini samblamba. Doa himba oholohvhowolvra hevna monglanamba, indkumbiva hembra nonglatithoawolvra, himba pem viwul vevra. ¹² Wo no moashulnindrini samblava ehellevna moam, phunvna senakembellamba, unna, hom epro, wo himba os evongona senamba tekomera. Ungundva henamba yunalm naengho vewol velvohkavna, himba evongovnamba.

¹³ Wo henanam snavema nenvpa kekaiv vevna, wo no kotamba mongnahalva doa poavrana hona

kin, mongnahalva mindnam mendah lohv. Wo indhanamba no nenvrava os dalna 7000pelara. Wo nomba dalmba owai vevnamba, himba pemba os vivna i. Himba okulivna Sesoamba senaminimba. ¹⁴ Hillu, doa hona kinmba mendekliva phunna pethanindmba, heva os mongova mendekliva sahoklalva lilnam si ambo provav.

Henga Mongo Membu Vuvpa Ov Eunillini.

¹⁵ Wo henga mongo noi ovsongolnindrini hevna vuv pia, wo ona hillina, mindnam moamba phovna senaminiva. Nomba moamba os ovna, Sesoapa pina mendekli eva Yesus Kristus, nomba temba himba pusvundthoanamba, kuwulm wulluhunilm, hesambla doa ambaramba ephona, kuwulm ewulluhunilm vavawonam petharam. Wo he si ewulluhvav, osmba yunalm yunalm vitivhoahui.

¹⁶ Wo 24pelara kuwulva ovsongolnindva mulumbdandna lohvoapramnana, wo sembayang vinivna Sesoam. Men honi kuwulva himba av sena hevna vuhera novra Sesoainda. ¹⁷ Hev una, Sesoapa, yimba mendekli wohav, henoi ten keknamangas lohvm. Yimba noi, doara anamba, veiva, men daipota. Kava yemba os umniv, yimba lehra, manara, yimba doa ambara kovonei hona andramba, kuwulm wulluhunilm. ¹⁸ Indhanamba indkumbiva pethanindva vavawonamba wusapramana venavna yemba, heva os daipota men yimba wusprunv hembra. Daipota men honanam luhunv, indhanasongomba lesvhoawolalmba.

Men honanam daipota luhunv, esesmba vinilmba pevna andranindmba besalmba, nom moashulnindmba, eva pevna indhanam, eva indhanam indkumbim, himba yenapenam vivnamba, taivwonam avna. Eva snamba memba ovna, mendekli kuwul, eva ombandhana. Daipota men honanam indkokla vewolalmba, henomba temba himba indkokla vewol vivnamba pethanindmba.

¹⁹ Ovsongolnindva osva ishupieinamba, wo Sesoana tempelduvpa senaminiva velavhoavna. Wo nomba petiva, noindava yithalohvpa lohohmomba, nomba Sesoava temba vrahunnamba hevtindimba Israelnindmba, indkumbiva di nunglivna mera Sesoana tempelduvra. Wo diva wingva ambo lavrivilna, hulaikala dahavnamba, nenv snavema, eva aishonam vuvina pona.

12

Saiholava Ungevlirininim Indkokla Vrelm Vevna.

¹ Doa henanam mana vemava indanam heva ambo kelathavna ovra, indhanam wokla lavra-holothuna, osm Sesoava mana vema mendekli doa vena. Mongo ungevlirini lohvna diva, wo okombava himba vethana hevna pikianmsna. Wo weisva lohmanavna di vuehisingi monglara, wo 12pelara paiva wosalohmanavna topimsna hena kurava, kuwulna topi. ² Wo doa henanam no ungevliriniva ena avna. Wo doa osoa ambo kelathamnavna, otolm lengalm, noinda himba on-davna.

³ Wo henga mongo osoa mana vemava indanovna phomnavna ovra. Nomba yunam snavema aembul saiholava. Kuwulva 7pelarava lovahmanavna, wo kasalva 10pelara lovahmanavna. Wo osoa nomba himba iavna topiva 7pelara king kuwulnamsna, nomba wohlehra vethamnana kumba indakonda. ⁴ Evditna sanangnamsna wohkelvapipihana paimba mindnamba senaminiva hom petharam. Saiholava hevpa di lohmanavna novlomossis ungevlirininamba, doa sapw lovna, doa henanam os lengna tuendisrinimba. Saiholava nomba winelm venavna no ungevlirinina otolmba.

⁵ Ungevliriniva nomba otolva lengnamba, he si moamba wulluhunvav annindm, annindm, Sesoava doara doa hembra ona nongaihana avalna emera, wulluholmba besi alamba kuwulnamba. Heva os hena otolmba waivolna Sesoaindam eva hevna vuheram kuwulna vuheram, noinda osva winenamoa. ⁶ Wo no ungevliriniva os wohgana sahalpetharam, dom ten doara Sesoa hevm pongvhoamnanam. Wo hembra di si beswonam vrowovav, osva verava, okombana sinamba os lohmanavav 1260pelara.

⁷ Wo henanam diva senakembellava daosva ohovna. Maikel eva hevna ovsongolnind ahalvamana vevna saiholamongo. Saiholava hevna ovsongolnindmongo esesmba ahalvamana vevna Maikeltatanamongo. ⁸ Wo heva os owai, saiholava andrasowolva owai, himba wonowolokohana vuhemba senakembelliniva. ⁹ Hembra os pilpiapovna senakembelliniva. Nomba saiholava doaramini os alv hembra, Setan. He wetat owol vev pimba indhanamba Sesoaindamba, nonamba

pivva indkoklava vivpa. He kuwulva wulluhunv indkumbimba pethanindmba, deisumbingalmba monakoklaramba. Saiholatatanamba os woh-pingipuv vena petharamba.

¹⁰ Wo kava hellevna, moalamangmba mindnam senamini ovna,

Sesoava doa pimba lopshawol vena, wo eva himba ambara doa kovonevna honamba andramba, kuwulm wulluhunilm. Kristusva, nomba temba Sesoava doa pusvundthoana hembra kuwulalm, aralva doa heina wohslowothona, noinda himba keknasowolnamba wohlohv.

Manara, honamba indhanariniva, himba temba pimba wetat owol velohvpa, pim, pivna mongawa Kristusnindm, ova sinim okombanam Sesoana novrava, heva os ovsongolnindva doa hembra pilpiapovvna hom petharam. ¹¹ Wo pina mongawa Kristusnindva, himba hevna almba beswonamba ningvnamoa hevmba. Owai, himba keknam lovahvna sipsip otolna tovolnambara, wo ova himba wuleihivnamoa, eisholmba moanonoava. Himba pemba vinvnamoa ungunnapenamba, osmba kamba sem si dalvra. Hona wevsarava himba doa kuvhueina Sesoana vuhemba.

¹² Wo noinda ova yeoa indk vithu, ye senakembelnind eva ye, no ovsongolnind ten avm di sena. Heva os si indkokla ongolohvav pethanindmba wanplombnindmba, manara, doa Setanmba prunna hembra. Hembra doa wohwusprona mindnam. Manara, himba nonora lohv, ova henamba mindnamba nambaiva lohvmoa, almba.

¹³ Doa saiholava nengna, osva kamba doa pilpiapovna petharam. Wo himba engavao- mana vevna no ungevlinirim, ten lengnam no otolm. ¹⁴ Wo heva os no ungevlinirimba doa dombtreuhna anglalsamblava hultuwa mendek- linamba. Wo himba nona pholahangavav no vuheramba, temba hembra kokolma venongtho lohmanavnamba doarava sahalpetharava. Wo diva hembra si beswonam vruwuvav, os verava, osomba os lohmanavav samblamong eva mungil. Wo himba si di avav dawonam saiholanape- namba.

¹⁵ Wo no saiholava sovhopiavna pomba hevna mengmerini, po elhulal, osm noi pueumbmba wavvrava, os wulangavav noi ungevlinirimba.

¹⁶ Heva os pethava hembra wohkolvrana. Wo no pethava hevna mengva owolanamba, pilnunghoana pomba, nomba temba provnamba saiholana mengmeriniva. ¹⁷ Wo no saiholava osva wuspromnavnamba no ungevlinirimba i. Wo venamba, himba daosm nengandvrinvna monglam hena towandmba. Hena towandmba, nom ten engminivnam Sesoana lohohmom, eva ten levrapivolvnam Yesusna moanonoam, eisholm. ¹⁸ Wo saiholava di lohna wanplomb engalpethalla.

13

Sungeittata Indhanawongava.

¹ Wo kava ona nonglana, pai men ihphov sungeittatava wanplombmerini. Himba os ilo- hvna 10pelara kasalva, 7pelara kuwulva. Wo top- iva wohlehra vethana nomba kasalmba, kuwulna

topiva. Diva Sesoam moakokla novol velungu venavna no indakonda kurava. ² Nomba sungeittatava snal maim ona, pus mendekli, os nengsmoa uv, lepat, wo monglava snal vilunv men beana. Wo mengva snal maim ovna, laionna. Saiholava hembra slowothomnana nomba hevna manimani, nonapopolmba almba, eva moapul, wo eva hevna vuhera ondesvhona.

³ Mongova kuva sungeittatanamba snal maim ona, doa lunamba, helvakomandhina. Heva os doa wohphona henga beswonam. Wo vavawonamba pethanindva evekingil avramana vevna, wohengivna sungeittatam. ⁴ Indhanamba saiholamba okulivna sembayangna, noinda himba doa vraohna hevna moamba sungeittatamba. Eva himba sungeittatamba okulivna, una, an eva snamba lohv, memba himba lohvpa? Ani eva himba ehelvowolvav, kuvhoavav?

⁵ Sungeittatamba Sesoava dawonam nihva wulihamnana, hevmba wivelmba, eva osva ishomnalmba sahonamba Sesoamba. Hembra nombolvhoana, hona wevsakoklanamba vaomanalmba, weisva os lohmanana, venamba, 42pelara dalmanana. ⁶ Wo noinda himba hevna mengva owolanamba, sahonamba ishomnavna Sesoamba. Himba ishovna, Sesoana nihilm indkokla ovramnavna, eva vuhem nom, noinda avnam Sesoa hev, eva Sesoanindm, nom ten aevulvnam senakembella. ⁷ Sesoa hembra nihva wulihamnana, daosm nengandvrinilm Sesoatindim, eva helvawolalm. Noinda himba kuwul wulluhunvna indkumbimba, hindtindim, hindtindim, eva indakonda moanam, eva snatovnam snatovnam, eva indkumbim

pethanindm vavawonam.

⁸ Memba himba nomba avpa huiva petharava, si okulivra sembayangnamba sungeittatam. Manara, nonamba Sesoava doarava pethamba vevnamba, veiva, daipota men, henamba nihilva lopo veluhungu vinvnamoa sipsipna tombairava, temba noindava kilihavpa, beswonamba yunalmba wohalmba. Hona tombairava memba hona indhanamba, sipsippa doa hembra daswolna, undmba nonapopolmba wohalmba yunalmba. Sipsip otolva, noi ten helvakomandhinam.

⁹ Hillu, himba nomba aongnamba lohtava, heoa hillivra.

¹⁰ Sesoava doarava osva mongomba Kristusnindrinimba kiki vretava, buirava almba, osoa wohavra buira. Sesoava doarava osva mongomba kiki vretava, helvakomandhilmba ovlakasbonanamba, osoa hemoa helvakomandhira.

Memba honamba tombaimomba, osm Sesoatindioa keknam undnahonam ara, heva kivrawuliha vrelm owaiva.

Sungeittata Henga Mongo Phona, Indhanawonga.

¹¹ Wo henga kava nonglana, mongom sungeittatamba indhanawongamba phovna pethamerini. Kasalva henamba elohmanavna sambla sipsip otolnamsna, heva os ishovna moamba saiholamsna. ¹² Honamba sungeittatava lohvena di mimirinina ovalna novlomossis, wo mongawapulmoa evevrvana, ten noi seilmini vrevnam. Himba yihvna indkumbimba pethanindmba, sembayang vevuvmonalmba

nomba mimirinimba sungeittatamba, ten seilm lunam, helvakomandhalm, heva os henga beswonam pho. ¹³ Wo nomba sismini sungeittatava mendekliandrava vewol vevna. Himba mongova mendekliandrava os vena, suwemba holapevna ovrini, indkumbi nonglatithoavnamba.

¹⁴ Sesoava dawonam nihva wulihamnana, ona, vaomana vevra snanovna snanovna mendekliandrava no mimirinina sungeittatana novrava, wo hona wevsanamba himba ambo daswotvna tendona onganam pethanindm. Hev wohtvna indhanamba, yeoa viu lehvohalmoa mimirinina sungeittatana nihna, osm okuluvmona velm hem. Memba noi lunam ovlakasbonana, wo heva os beswonam phona henga. ¹⁵ Sesoava hembra eva nihva wulihamnana, ona, yeoa mengtovoova povsiha vemno nomoa lehvohalmoa, temba indhanamba englanamba vinamba sungeittatanamba, osm himba moamba ishovra. Wo henomba owai vivrava, nomba owalna lehvohalmba okolalmba, sisminiva sungeittatava si hembra helvakomo vevra.

¹⁶ Wo nomba sisminiva sungeittatava wohtvna nengnamboasnam indkumbimba indhanamba, eusilm, mundilm, bimbsnindm, innehuinindm, ombandhana andranindm, eva kuwulhuim, lehvohal lopo vivna hevna nihanasis englam eva mava mira, yunalm wohsingthana hembra. ¹⁷ Noinda anvema maketramba gavav lehvohalhui sungeittatana. Honamba lehvohalva memba, nihil sungeittatanana. Memba osm, nomorva novol velohv, henoinava

temba sungeittatana nihil. ¹⁸ Himba nomba beswonamba honamba levrapiivolalmba vivrava, osoa aslavra plalmoa, osmoa ora, esm dihi lohv nomorva no sungeittatanamba? Honamba himba nomba levrapiialmba vetava beswonamba, heoa nengavnangoa vrevra, os honamba nomorva mongona indhanarinina nihil. Honamba nomorva men 666.

14

Sipsiptindi Tendona Ongana Sangalva Nemel Ovuvrina.

¹ Kava henga ona novvelohna, pai, di kava nonglana sipsip otolmba. Himba di lohvna Sion olora sena. Wo diva indhanamba hembra os pulningena 144,000 pelara. Wo indhanamba nomba nihilva os wulluhpravna hevna mirava, vevna, Sesoa ombolna eva Sesoa aralna. ² Wo kava hellevongo vevna weitm senamini, os maim ovna, pueumb ongov, eva maim ovna, hulaikalawut ov. Kava hellevnamba, os maim uvna, indhana vendwol vivna gitam. ³ Wo himba sangalva nemelva di sivreivna novlomossis vuhemendeklipethal, eva di ten no ovsongolnindva novna 4pelara lovahvnam, eva no kuwul ovsongolnind. Henongas ten no nemel sangalm nonora lovahvnam 144,000 pelara, hembra doa lopshawol vena pethariniva. Hengava an eva si levrapiavav nemelmba sangalmba?

⁴ Honamba 144,000pelarava henoi, himba owai, mana vema indkoklava vivnamoa, maim ui, himba ongariskuihui avnam. Himba hevmba beswonamangas wohpopeng avramana vevna.

Himba wohtellohmana vevna sipsip otolmba no kembellam, no kembellam, himba domba gavnamba. Memba honamba 144,000pelarava no indhana hona petharini, Sesoava doa hemangas muehrombol vena indhanahovriniva. Noinda himba Sesoanangas av, vei aralna eva sipsip otolna. Noinda himba snal av, inne ten osorini nihil ophoim hesnal, Sesoam dembraholm.
⁵ Himba owai, eishovnamoa dasalmba. Wo henamba owai, mana vema indkoklalva luhungu vinvnamoa.

Samblamong Ovsongolnind Indhanamba Ongawol Vilembvna.

⁶ Wo henga kava ona nonglana, mongova ovsongolnindriniva mepeh sena dalohv. Nomba ovsongolnindriniva moamba besal wulprovna, eishunilm indhanam, alm nonam yunalm, nom hindm hindm, eva indakonda moanam, eva snatovna snatovna, eva indkumbim pethanindm vavawonam.
⁷ Wo no ovsongolnindriniva moamba mindnam opiprana, keknam indnahonam nesmoswonam popeng vinu Sesoam, wo besal sembayangmona okulivm. Manara, doa mumra vev nambaiva, Sesoanamba lesvhoawolalm indkumbimba indhanamba. Sembayangnaoa elsus vewuvmona venavm Sesoamoa. He vewol vena senakembelm, petham, wanm, puthovhoalm pom.

⁸ Wo henga sis mongo owalm pethamnana nom minindrinim, he onam, kotava doa indkokla vei. Doa mendekliva kota Bapilonmba indkokla wohvei, hona kota Bapilonangas he indkoklava vena, osmba annind, annind indkumbiva

wohengivna wevsa mendeklimba henamba ongariskuinamba, os maim ona, wain dahwol venamba. Memba osm olhv honamba moamba, indhanamba meis doa hehara omnana Sesoamba.

⁹ Wo nomba hengava pronamba sismba, owalm minindrini samblam engwolvna ambo. Wo hev noi opianam moa mindnam. Os ona, si indkokla vilovav no indhanamba, temba sembayingnamba vewuvmona venavpa sungeittatamba, eva hena lehvohalmba, wo dumbvnamba sungeittatana lehvohalva temba, vevna mira, englara. ¹⁰ Himba si nevav wainmba Sesoana daosmonahonam. Honamba wainmba doa kokolma velohv hevna pulnahonam Sesoana kapra, wo heoa mama yunam nooa wohnera. Noinda himba si nihsesoava mendekli vravav suwe hondiniva Sesoana ovsongolnindna novra eva sipsip otolna novra. ¹¹ Wo suwulva yunalm nomba pulundtholohvna, temba suwemba nomba nihsesoava daswolvnamba indhanamba. Wo nomba indhanamba owai, es eva pemba angavta, sia okomba osangas ambo wosalohvna, temba himba sembayang velvohmanavpa sungeittatamba eva nom lehvohal henam, ten indhanamba englana weis vewol vinam nengnam, wo temba himba wulapramnavpa hena nihilva, osvva vei mira eva englara.

¹² Memba honamba tombaimomba, osm Sesoatindinonoava keknam av. Heoa wohengivra Sesoana lohohmomoa, wo hevoa keknam indnahonam amnara Yesusmoa, heva kivrawuliha vrelm owaiva.

¹³ Wo kava hellevna moalamangm senaminim. Os ovna, novol vewol veo honam, daipotam eva

verava, si sewonam, nom dalvram, nomba himba keknam amnavpa Yesusmba, nonamba hembra dalvrava, himba beswonam indk vithivav. Sesoa-songolva eva himba os ovta, nomba tanamta. Manara, himba si vahva iaevvav mindnam hevna andra helvatotollava. Andrava temba hevpa vivnamba petharava, innemba nomba si iangavav senakembellam.

Doa Innemba Nihil Veprana, Vralmangas.

¹⁴ Wo kava henga ona novvena, pai, kava nonglana mongo dombal tekova. Avna no tekomera indhanariniva, nomba snal men arana ombol lohvna. Himba wulavna topi gol hevna kurava, wo englanamba ovla andralnonoa wulavna. ¹⁵ Wo mongo ovsongolnindriniva phovna tempelduvmerini senakembellini. Wo hev dandwonam omnana henom, nom ten avnam tekomera, vrao pevna ovla andraloa, wo hilemohla veo innem. Doa innemba nihil ksuvhoaprana petharava. Memba osm, Sesoana wusrava doa mura prov. ¹⁶ Wo no indhanariniva temba himba avnamba tekomerava, lionamba hevna ovlava, innem nona ohlotho. Noinda vena, doa innemba petharava nihil wohksuvhoana.

¹⁷ Wo mongova ovsongolnindriniva Sesoana tempelduvmerini phona di senakembella. Eva honamba ovsongolnindriniva wulluhvnata ovlava andral. ¹⁸ Wo mongova phona ovsongolnindriniva alta sengrini. Hona ovsongolnindriniva kuwulva wulluhvna suwena. Wo hev omnana owalm, nom he ten wulluhvnam ovla andral. Hev omnana, vrarava pevna andral

ovla, wo pueito grepmovm hona petharinim, doa wohksuvhoana.

¹⁹ Doa ovsongolnindriniva lionamba hevna ovla andral, nona pueitna grepmovm. Himba huhul vewol vena hevnavhora, monglana wolpalakand vewol velm wainpolalm. Nomba vuhemba temba lehv, Sesoana wusprunilmba indhanakoklamba. ²⁰ Wo himba di monglana wolpalakand vewol vevna grepmovmba mendekli vuhera ambara kotapethalla. Wo nomba melliniva phovnamba, indhanana tovol. Wo heva sena pivivavna, ovna, indhanarinina ku, mani eva murama, owai, os 300pelara kilomita gavna.

15

Eunillini Kin Mongo, Noi 7Pelarini Snal Snal.

¹ Wo henga mongom kava nonglana indanam mana vemam phovna ovrini. Wo kava evekingil ahalna, ona, mani hevpa memba snamba? 7 Pelara ovsongolnindva 7 pelara kinmba iambinna indhanamba. Honamba kinmba memba eunillini, noinda honana suvsamblava kindava, Sesoana wusprolmba si os wohkik vevav.

² Wo kava mongova mana vemamba os nonglavna, ovna, mendekli wanplomb. Heva os suwena glasna nonahonam vina. Indhanamba nomba temba himba kuvhoapranamba daosmba sungeittatam, eva hevna lehvohalm, nom ten indhanamba englana weis vrinam, eva nomorm sungeittatanam, ovna, es lohmanav nihilva. Wo himba popethalla lovahvna di, gitava

ilvahvna englana, noi Sesoa daswolnam. ³ Wo himba ovuvrivna sangalva, snal ten Mosesna doaraminim, Sesoana moashulnindrininam, eva sipsip otolnam sangalm. Sangalva os dihelv,

Mendekli, yimba Sesoa keknamangas wohlohv. Yimba mendekliandrava velohv besalangas, wo kava nomba nunglivpa, kava indk vithiv. Manimani memba venamba mendekliva, lehrangas tanamangas, manara, yimba kuwul wulluhunv annindna annindna hona petharava.

Buk Song 111:2, Amos 3:13, Buk Song 145:17 ⁴ Mendekli, yengas mongal av windelva. Wo noinda osva indkumbioa yenapenamoava vivra, wo nihilmoa yenamoava senam wulovolvra. Indkumbiva indhanamba si ambvrava, yemba okulivra sembayangna. Honamba memba, yena pevna wevsava doa ambara phoi, dendalangas. *Jeremaia 10:7, Buk Song 86:9-10, Lo 32:4*

⁵ Sismba kava nonglana lairduvm senakembellinim, nom Sesoana sembayangdvm. Sesoana omokalthamomba di mera yithalohv, wo tuvpa velaihalohvna.

⁶ Wo nomba 7pelarava ovsongolnindva ipulvovna 7pelara kinmba no tempelduvmerini, pelhola vinilm pethanindm. Himba vevrana pikianmba besalangas nehramohralangas. Himba vevrana avondrava banmba noi golna ban. ⁷ Wo mongo noi ovsongolnindva novnamba 4pelarava, himba dembrahunvna 7pelara gol pirinmba nom ovsongolnindm 7pelaram. Nomba pirinmba

pilivhoangu velohvna wainna, nom ten lehv Sesoana wusprolm, noi himba yunalm wohavm osangas. ⁸ Wo nomba tempelduvpa wohmera vethana suwul, suwulva nomba lehvna nom Sesoana pusambam eva keknasowolm. An eva ata sihata no tempelduvrava, heva boasna noi ⁷pelara ovsongolnind nom kinm ⁷pelaram wohvipieirava.

16

⁷Pelara Pirin Golna Indv Lohvna, Sesoana Wusprolva.

¹ Wo kava hellevna moalamangm mongom, phovna Sesoana tempelduvmerini. Os ishunvna ⁷pelaramba ovsongolnindmba, angawul vevrava, mulgothowol vilangavm nooa ⁷pelaraoa pirin gola Sesoana wusmoa petharaoa.

² Doa mimirinisna ovsongolnindriniva vohavna, doa sovhopiavna pomsna petharam pirindini. Wo venamba, ona nungeilna, yimombva esvema hilivhoavna indkumbimba, nomba temba himba avnamba sungeittatana lehvohalnamba, eva nom, hanoi ten sembayangna okulimnivnam hevna lehvohalmba.

³ Wo pethamnalva ovsongolnindriniva hevnamba pirindiniva sovhopiana wanda, wo wamba tovolalm nilhana, snal indhanarinim ten dahaim, wo manimani nomba diva lohvnamba wandava wohmueisowa vena.

⁴ Wo hovrini ovsongolnindrini hevna pirindiniva sovhopiana elhulpra eva tindella, wo nomba pomba wohnilhaprana tovolalm. ⁵ Wo

kava hellena ovsongolnindrinim, nom ten pona
kuwul wulluhunvnam, hev omnana,

Sesoa, yimba doaramini, veiva, daipota men,
yimba wohav osangas eva windel.
Yimba lehra lesvhoawol vena honamba
indhanakoklamba. Yimba lehra ona, osva
heoa hona kinoa vreira. Yimba lehra ona.
⁶ Manara, himba doa helvakomo vina
yetindim eva pevna moashulnindm, wo
henamba tovolva doa sovhoral vina. Wo
doa yimba tovolva daswolna, hlalmba,
lehra yimba wohvinna.

⁷ Wo kava hellena, ona, alta sengva os ovna,
Mendekli, yimba Sesoava wohav pevna
keknasowolna, wo yimba lesvhoawol
vev wevsamba indhananamba, wo tanam
wetatva yenamba lehrangas.

⁸ Wo henga mongo ovsongolnindrini himba
sovhopianana hevna pirindiniva okombasra sena.
Wo okombam tuhona, suwemsna silvhoawol
vevna indhanamba. ⁹ Owai, esvema hembra
telovna mindnam, wo himba noinda indkokla
ovrivna Sesoana nihilmba. Sesoa hev hona
kinmba osva snanovna, snanovna dembhapra
vev, wo eva osoa hev vev, ollawol vev henga.
Wo heva os indhanamba sungeipilalga vevmoa,
weihaloh avramanalmba hevna undmba, almba
nonamba, wo popeng vivra Sesoam.

¹⁰ Wo henga mongo ovsongolnindrini sovhopia
hevna pirindiniva sungeittatana moainal
vuhera. Wo sia provna, os wohkuvuningena
nomba sungeittatana kembelmba. Indhanamba
ambo lo hlavna hevnamba, noindava hevna
nihsesoara. ¹¹ Himba kueisvivna Sesoamba

senaminimba, noinda hevna nihsesoarava, eva yimombwosavara, noi hev ten wulamanamana vevnam. Wo heva os himba oningvnamoa, weihaloh avramanalmba hevna undmba, wo eva meisva hehara omnavnamoa nomba sahoklalva, temba hevpa vivnamba.

¹² Wo henga mongo ovsongolnindrini sovhopiana hevna pirindiniva po mendeklira Yupretisra. Wo pomba nomba livnamba, yunalm wohkemdawolna, pok wohphona. Honamba memba mona wohvuenghinna kuwulm nom okomba pholsisrinim, ambalm noindam daosm. ¹³ Wo kava nongalna samblamongom tihsongokoklam, snal ovna, moango. Himba phosohungu vivvna saiholana mengrini, sungeittatana mengrini, moashulnindrini daspolna mengmerini. ¹⁴ Memba honamba tihsongokoklava nonora lovahvna, manam manam mendekliandrumba vewolalmba. Wo himba vivnamba, os bukethungu vivvna king kuwulindam indakonda hona petharamba vavawonam. Himba angawul vivvna kingm, osm inendmond vewolalm hem, wonamb velm hevna valgonindm, osm himba daosva wulpulvovav, nonamba Sesoana mendekli nambairava, himba wetatmomba wonishovrava. Nomba Sesoava himba wohav hevna keknaoswolna.

¹⁵ Yesus Kristus os ona, hillu keknam, kava si provav lelnam yukovindrimsna. Wo noinda osva himba nomba novkakava avrava, wo himba hevna pikianmba nihra iavrava, henomba si indk vethavav. Manara noinda himba gavavmoa nihpsva nihngasva, wo indhanamba osva henamba nihtovmba nunglimnivavmoa.

16 Wo doa tihsongokoklava wulprungu vevna king kuwulmba domba no petharamba, os sevriv Hipru moanamba, Armaketon, daosm ohohavm diva. 17 Wo henga mongo ovsongolnindrini himba sovhopiana hevna pirindiniva sena ovra, wo mindnam moatanmba phovna Sesoana vuheriniva, nomini tempelduvmerini, wo nomba moamba os ovna, doata, Sesoana wusprolva doa wohkik vei.

18 Wo vena, wing pihavnamba, hulaikalava mindnam ovnam, wo nenv mendekli pihavnamba. Nenvpa honamba sahoklalnonoa, doarava hona nenvpa snamba venamoa, indhanamba avnamba hona petharava. 19 Kota mendekli Bapilon pupkowl vena samblam-ongora. Wo indakondakonda wohmueisowa vungeinna indhanana kotava. Manara, Sesoava owai, es eva ata maivethata kota Bapilonmba, indkokla vrelmba hevmba mendeklimba. Himba vraohna no kotamba kappa, pilivhoalohvna wainmba, unna Bapilonnindm, hlao wainmoa. Honamba wainmba lehv Sesoana wusva, wo hindva nomba hlavrava, si himba pamba esvema vivra, wo hembra daielm vungu vinvra. 20 Wankokondvulpetha hev ambo hoai vilovna, wo owai, mongova hengava olomba lovahvnamoa. 21 Wo aisnahonam pomba snavemava pelpevna. Wo no aisva putral vevnamba petharamba ponahonamba honmendeklimsna, kinmba mara os vevnamba 50pelara kilo. Wo indhanamba kueisvivna Sesoamba, noinda aisra. Honamba kinmba owai sahoklalnonoa.

17

Ungevliriniva Hevna Nihtovrava Kinmba Mendekli Vrana.

¹ Mongova nomba ovsongolnindriniva pronamba, ishomnavna kam. Nomba ovsongolnindriniva mongo, noi ten ilvahvnam 7pelara pirin golna. Hev ona, protok, wo kava ata nov wolaihamnavav yemba, osmba ora, si os kinmba holothomnavav hona ungevlirinimba, temba provpa indhanamba osva i. Hengas amana velohv elhulprava. Memba osm olhv honamba moamba, mongo kotariniva indhanamba dim mendeklimangasm alm venav, owalmba desvulsihav, Sesoamba noinda meisrava opilihiv.

² Pethanindna king kuwulva hembra wohvruwul voahlohvna elsus ambo. Wo indhanamba ahui vevna, hembra vruwul voahalmba. Maim ovna, tendomba daipw nuwulaiva, noinda dai uv. Wo noi hena indkokla, indhanamba mai vewol vevna Sesoanaminiva.

³ Sesoasongol kamba nihra vrevna, os kamba ivtovmsna waingana sahalpetharamba indhanahuiramba. Wo di kava nonglana, ungevliriniva avna sena sungeittata aembulsra. Wo no sungeittatana nihrava moamba sahoklalva, Sesoamba sahamonamba okosvelmba, hena nihra novol vepe velohvna. Wo himba os ilohvna 7pelara kuva, 10pelara kasalva. ⁴ Wo no ungevliriniva vethawolna aambul kayenmba sambla, wo huhmohva snanovna, snanovna os indandpramnavna golna, eva wosmusung, honna vewol vinam, diva mindnam henamba. Wo himba wulavna gol

kappa hevna englana. Wo nomba wevsakoklava sahoklalnonoava, temba indkokla vevnamba Sesoana novrava, eva noi indkoklava, ten tendo hevm kekevra vrivnam, wo nomba yunalm wohpilivhoa lohvna di kapmara, ovna, wain liv.

⁵ No ungevlirinina mirava hevna nihil novol vepatha lohmanavna. Wo hona moapetanamba plalva poaita indanam komandhalohvna. Os novol vepatha lohvna,

KAVA MENDEKLI BAPILONKOTA, KAVA
AONGLASONGLA ONGONINDNA AVAL EINV, EVA
NONA MANIMANI SAHOKLAL HONA PETHARININA.

⁶ Kava os nonglavna no ungevlirinimba, dai ovna. Himba ninnamba tovol no Sesoatindina, eva hev vena, ninnam, nona ten helvakomo vivnam, noinda keknam undnahonam himba annavnam Yesusm, moanonoam eisholm.

Nonamba kava nonglavnamba no ungevlirinimba, kava luklukul ahalna. ⁷ Wo ovsongolnindrini kamba omnana, manara yimba pemba luklukul ahalv? Kava ata yemba ishomnavav, komandhalohv plalva hona ungevlirinimbamba, eva sungeittatanam, nom nosra hev lohmana ten vevm, os ilohv 7pelara kuva, 10pelara kasalva.

⁸ Nomba sungeittatava, yimba temba nonglanamba, doara temba lohna, daipotava owai, lohvmoa ambarava. Heva os himba si phovav no mellini, ten endalhui lohvm, wo himba si phorava, os hoai wohvevav. Indhanamba memba avpa petharava, si luklukul avramana vevra, nonamba himba nunglivrava nombamba sungeittatamba. Nemet doara heva, Sesoav vevnam petham, veiva, daipota men, hona

indhanamba, henamba nihilva owaimomolmba lovahinvmoa Sesoana tombairava. Nomba tombaiva, temba noinda kilihavpa, beswonamba yunalmba almba Sesoaindava.

⁹ Yeoa honamoa beswonam levrapieiu. Nomba 7pelarava kuva, temba lovahmanavpa sungeittatanamba, olo lovahmanav 7pelara, nosra ungevliriniva alohv. ¹⁰ Wo eva nomba kuwulva 7pelava lehv king kuwul 7pelaram. Nomba 5pelarava doara doa dalna. Mongova mendah av, mongova mendah lohvmoa king kuwulalmba. Sisminiva si nomba king kuwulalmba lohvavpa, si himba wenokombonamba lohvavmoa. Sesoava doara doa os nengavnangva vrena. ¹¹ Wo nomba sungeittatava nemetva temba lohnamba, lohvmoa himba daipotava, si himba lohvav king kuwulalm. Himba owal luhunv, nona ten 7pelava lovahvnam. Noinda hembra si wohmueisowa vilovav owalmongo.

¹² Honamba 10pelarava kasalva yimba nongalvpa, memba 10pelara king kuwulva. Honamba 10pelarava king kuwulva, himba mendah hevna kelsrava lovahvmoa kuwulalmba. Heva os si Seso hembra moamba dembrahunvav, kuwulm ilvahinilm no sungeittatanahonam, heva os ambo si espeta tovolihevav inella. ¹³ Honamba 10pelarava king kuwulva mongawa nengavnang wulvahvra, wo himba si dembreuhvav yunalmba hevna keknaowolva sungeittatamba. ¹⁴ Himba si daosmba nengeind vrivav, helvalm sipsip otolm, heva os sipsip otol si hembra vendkuvhoawol vevav, noinda himba mendekli luhunv indkumbinamba, wo himba king kuwul

luhunv indkumbina king kuwulna. Himba si vendkuvhoawol vevav hembra hevtindinana, nona hev ten doa doara kiki vewol venam, alm helmangas, wo engminivna hena moamangas. Wo ninda himba hembra si wonprovav daosramba.

¹⁵ Wo ovsongolnindriniva henga kamba ishomnavna, ona, yimba temba elhulpmba nongaliva, nomba ungevlirinikoklava temba nomba popethallava avnamba. Temba nomba pomba indhanam indkumbim lehwol vev, nom annindm annindm, indatovna indamonanindm. Nomba ungevlirinikoklava lehv mongom kotam, ten indhanam desvulsihavm, Sesoamba ninda meisrava opilihiv. ¹⁶ Nomba kasalmba 10pelarava, yimba temba nongalvnamba, lehwol viv kuwulm 10pelaram, wo yimba si os nonglavav, ungevlirinikoklava indkokla vrvrava. Sungeittatamongo vivav. Himba si manimani yunalm selvwol vinivav, wo himba nihps wohavav. Himba si nihilva suwera singminivrava, os hlamnavra. ¹⁷ Sesoav he nengavnangva doara daswolna, himba kuwulva si os vivav, os ten Sesoav doara nengavnang vrenam. Himba wohopulvomnavav, vraholmba hevna keknasowolva sungeittatamba. Wo himba si kuwulalmba os lohvav, verava, os ten Sesoav hev onam, os wohvera. ¹⁸ Nomba ungevliriniva, yimba temba nonglavpa, mendeklikotanonoa, he moalamangva wuleinv king kuwulnamba vavawonamba pethanindmba.

Bapilonmba Doa Wohindkokla Vena.

¹ Wo kava nonglana, henga mongova ovsongolnindriniva holopevna senamini. Nomba ovsongolnindriniva mendeklinonoa wulluhvna keknasowolva. Wo henamba huhmohva vevnamba, pethava manimani nokambarangas wohlohvna. ² Wo doa no ovsongolnindrini vevandnam ona,

Doa mendekliva kota Bapilonmba wohindkokla vei. Doa hembra nilhai tihsongona kembelalm. Hembra doa nilhai vuhelm, doahna tatalm. ³ Manara, heindava indkumbiva indhanamba pethanindva esvema provna, hembra vruwul voahalmba. Os ovna, wainda sihaka venav heinda, noinda vendral vevna. Pethanindva king kuwulva hembra kekevra vrivna, eva bisnisnindva nomba annind annind, himba henamini diva vravna, wo heva os owai, himba hevpa lou vevnamoa noindava. Membra osm, nomba kotava nomba indhanamba doa mai vewol vena Sesoanaminiva.

⁴ Wo kava hellevna henga mongom moalamangm senaminim, ovna os,

Yea kana indhanaoa, phopiao no kotamerinioa, osm yemba si pepeivivavmoa no hena wevsakoklarava. Wo osm yimba si nomba vreivavmoa kinmba, mana vemava si hembra venavrava. ⁵ No kotana indkoklava doa pomsna pilivhoavongov, ovm tutuh vrev. Sesoava maikumi venavmoa, nomba temba himba vevnamba. ⁶ Yea esesm vinu no kotamoa, os ten hev

vevnam. Kokolma vinivm wainoa andralangas hemoa samblalm, os ten he kokolma vinvna monglam. Wo noinda himba Sesoamba meisrava opilihivna. ⁷ Manara, nomba kotanindva himba hevmba mindnam wohwivewol vivna, bimbsnindrini avna. Wo noinda osva esvema vinvm esesmoa, osmoa noinda heoa wena avra. Himba hevmba os ovna, kava king kuwul wuleinv kavna mendekli vuhesra. Kava peliongo va owai, noinda kava si und sivrawonamba amana vevavmoa. ⁸ Wo noinda osva hona kinmba mana vemava si promnavav hembra lilnam. Honi si promnavav, sihavra, indhanamba vevandra va mindnam wenumbsna avra, owous mendekli nongalphovra. Hembra si suwera wohtepevav, noinda mendekli Seso he hembra doa lesvhoawol vena, wo noinda osva hembra wohmueisowa wohvevav.

⁹ Nomba king kuwulva pethanindva, hembra temba vruwul voahvnamba, wo manimani waivivnamba, si nunglivav suwulmba, hembra weisumbla ovrava. Wo himba si wenumbsna avra kumungilmsna, nonamba hembra dahavrava. ¹⁰ Heva os himba si pem vinivav hena kinda, wo ehalla pulundthoawolvra. Himba si os uvra,

Wavro, wavro, mendeklikota, yimba mendekli, wo eva yimba keknasowol kota dihelvna Bapilonmba. Heva os ambo lilnam yihvoh-tara esesmba doa phomnav yemba.

¹¹ Wo eva bisnisnindva pethanindva indkumbiva si wuovra hembra. Himba si

duusna avra, noinda doa owai, avmoa mongova snamba, sovawolalmba, nomba manimani himba temba iamb vevrava, esvowolalmba. ¹² Himba noi wulprovna, gol, silva, hon besal, wosnakumna, diva vongavna henamba, eva besalangas dombal tokol kayen, wo eva aambul tokol kayen, eva ovshanovol. Wo eva timba, noi hevm besal teteihnungnangas, wo eva noi ten vevravna, nona tina besal, di ten esvema vongamnavnam. Wo eva vevna, mana vema noi ten nona nuvewol vivnam lehvohalmba, eva besi eva hon noi besal lohoholnahonam. ¹³ Wo honamba yunam manimani an eva ata sovawol vevta? Sinamon lang, sauwa, valsowa innerini, eva ti teteihnungna besalm ovtovol, eva wel besal hevm, noi teteihnungna, eva plauwana witna noi wulprovna. Wo eva no sapi, sipsip, hos, mutengal karis kindini, eva ombandhana andranindm, noi eva osoa indhanam.

¹⁴ Nomba bisnisandranindva si os eishovra, Bapilon, manam manam yimba besalmangasmba nengvnamba, doa hoai vena yenaminiva. Manimani wohva besalva di mendeklinamba doa yenamba wohhoai vilona. Yimba si hengava iavavmoa.

¹⁵ Wo himba si pem vivra hena kinnapenam, wo okla lovavra henaminiva. Himba no indhana, ten manimani wulprovnam hevnamba, esvowolalm heindam, noinda himba bimbsnind avna. Nomba indhanamba si wenumbsna avra.

¹⁶ Himba si os eishovra, Wavro, wavro mendeklikota Bapilonkolo. Himba vewol velohvna dombal tokol besal eva aambul kayenmba. Wo yemba golla in-

ehramohra vethavna, eva besal honna, wosnakumna, nona pevm yimba huhmoh vrevnam. ¹⁷ Wo honamba manimani besalva wohva wohmueisowa vena, ambo lilnam yihvoh vena.

Sipna kuwul, indhana noi avnam sipmera, sipna andranind, wo eva osoa hind, noi ten bisnindra velvohvnam wanda, himba hivema ehalla lovahvna Bapilonrava. ¹⁸ Himba di nonglamb velvohvna suwulmba, hembra weisumblovovnamba. Wo hev vevandnam mindnam una, lohvmoa snamba kotava mongova, honamba kotava mendekli va memba. ¹⁹ Wo himba pethasavna avna wena, osm vivna, doa kamba nihnahonam polavra vovhoawol vei heinda. Hev uvna,

Wavro, wavro mendekli kota. Indkumbiva nomba sipnindva wannindva himba bimbsnindva heinda avna. Heva os owai, doa hembra wohmueisowa vei ambo lilnam yihvohtara.

²⁰ Wo henga mongo moalamangmba hillivna, Yeoa senakembelnindoa indk vethapro, vei Sesoatindinonoa, moashulnind, moalamangnind. Manara, Sesoava doa Bapilonmba indkokla vruwulluhna, manara, ten hev sahonam vinvnam yem.

²¹ Wo doa andral ovsongolnindrini, hev tongvenamba hon mendekli, snal nona ten witm tith vewol vivnam. Wo hev nomba honmba vilipihinna wanmera, wo ona, Honmba memba lehv, osm si os mendekli kotava Bapilonmba tuplosapevav yuhvohtara. Wo

si hengava nomba kotamba nunglivavmoa. ²² Wo noinda osva manimani gitawit daharava, wohanavuv dahavrava, biugel ongovrava, si hillivramoa hengava yeindava. Indhanamba nonoanindva, yimba si nomba hilwulvramoa hengava, witmba tith vewol velmba, si hillivramoa hengava yeindava.

²³ Lampuva si tawovramoa yeindava hengava. Tendona ongana moamba ongamomba si hillivramoa hengava yeindava. Manara, yenamba bisnis andranindva, seilmba himba kuwulnonoamsna ana indkumbina novrava, wo heva os himba daswotvna hevna moapulkoklana indhanamba indkumbimba pethanindmba.

²⁴ Yimba sahokla vevna mindnam, yimba helvakomo vevna moashulnindm eva Sesoatindim eva hindm, nom ten helvakomo vivnam pethara. Noinda Sesoava doa Bapilonkotamba indkokla vrena.

19

*Indhanamba Indkumbiva Indk Vethaprana,
Noinda Bapilonmba Somovmsnamba Nilhavna.*

¹ Wo sismba kava hellevna, ovna, powut ov, nomba moatanmba prunvna, nona esvema ten avnam tendona ongana senakembella. Himba os eishovna,

Haleluya, pioa okolalohmanara Sesoana nihilmoa. Seso pinna hengas pimba lopshawol vena. Himba av mendekli nihilna eva keknasowolna. ² Henamba lesvhoawolalmba tanam eva lehrangas.

Pina Sesoava doa hukum vena ongariskui unguvlirinimba, hengas indkokla vrena pethamba, kulohna hevna ongariskui wevsakoklana. Wo noinda esesmba Sesoava hembra kinwondava plothomnana. No ungevliniriva indkokla vena, heinda dalna Sesoana andranindmba, wo noinda Sesoava hembra esesmba venana.

³ Wo henga unam,

Haleluya, pioa okolalohra Sesoana nihilmoa. Hembra doa somovolm ihpei, wo hena suwulva si yunalm tepiavongowovav ovhoapihahui.

⁴ Wo doa vena, 24pelara kuwul ovsongolnindva, eva ovsongolnind novna 4pelara, himba mulumbdandna ku kusithapramnana. Wo himba sembayingna okulivna Sesoamba, ten avm mendekli vuhesra. Hev uvna,

Tanamolnam, pioa hemoa okolalvohra.

⁵ Wo no vuhemendeklirini Sesoana mongo moalamang ophovna os,

Okulivm pivna Sesoam, indkumbiva yimba temba hembra andra vinivpa. Okulivm pivna Sesoam, indkumbi pev ten nihilm opivolvohmanavm. Indkumbi viu, vei, ombandhana eva kuwulmendekli.

Sipsip Otolva Ongamba Vranamba, Tihva Os Lohna.

⁶ Wo kava hellevna manawutsnamba ovna, plombmsna olv mindnam indhanamba. Os weitva ovna, ona, pueumb opravmi, ovna hulaikala ov. Heva os indhana okulivna Sesoam,

Haleluya, pina mendekli Sesoa, himba
keknamangas av. He kuwulva wuleinv.
7 Daipotaoa pioa indwonam indk
vethaprara, wo okulivra hena nihilmba.

Okulivm Sesoamoa, manara noinda doa
murapeta vev, sipsip otolva ongamba
vralmba. Wo sipsip otolna ongamba doa
lehra av, nungulmangas tlaram. 8 Besal hevm
nemelangas dombal kayenmba moanvrehna,
no ungevlinrimba vethalmba. Nomba kayenmba
hevm nehramohralangas nemelangas.

Nomba ungevlinrimba olhv Sesoanindm ind-
kumbim. Nomba kayen besalva memba osm,
manimani besalangas, ten Sesoatindi pethara ve-
wol vinvnam, nemet ten nona avnam.

9 Wo ovsongolnindrini omnana kamba, novol
vewol veo hona moaoa, henomba temba das
owol vevpa no onganungrava innerava sipsip
otolnahonamba, heoa indk vithivra. Wo hev
ona, memba tanam honamba moamba Sesoana.
10 Wo kava ku kusithamnana ovsongolnindrini
monglasra, sembayang venalm hem. Heva os
himba kamba omnana, ata ye kam sembayang
venavav. Kava ambo andranindrini, os ye men,
eva pevna mongawa Kristusnind, ten Yesusmom
tanam eishovm. Sembayangnaoa okulivm Sesoa-
mangas, manara, tanam hesongol daswolv nen-
gavnangva, eisholmba Yesusmomba.

Indhanariniva Sena Avna Hos Dombalsra.

11 Pai, kava ona nonglana, doa senakembelva
velaihalohv. Wo diva lohvna dombal hosva. Wo
nomba indhanariniva, temba hossrava avnamba,
os alv hembra, indhanarini besal, andrava himba

hevnamba beswonam wohlesvhoav. Wo himba no moanonoam wohengv. Himba lehra vev, nonamba hevpa lesvhoawol vev, eva daosmba nepkuva dathov Sesoana ungundm. ¹² Novpa henamba ovna, suwe tav, wo hena kurava esvema topiva king kuwulnamba hohlolohvna. Wo heindava novol veluhungu vevna nihilva, wo heva os himba hevho nonora lohvena nomba nihilmba. Mongova indhanariniva owai, nonorava lohvnamoana nomba nihilmba. ¹³ Himba hevna pikianmba wohgovhoana tovolna, wo henamba nihilva Sesoana Moa.

¹⁴ Wo amiva senaminiva pelkleihamnavna sis hembra hos dombalsra. Himba vevrana besal pikianmba, dombal nemel hevm. ¹⁵ Wo nuveskolva ovlakasva piviavna mengshara no indhanarinina, ten hossra lohmana velohvnam. Himba si nona vevav no ovlakasna, helvawolalm indhanam, osm hindm hindm. Wo hev vena, besi ala pethana, wo nona kekalvho vewol vevra tendona onganamba ungundnapenamba. Wo himba si wainmovmba wolpalakand vewol vevra no vuherava, temba lehv mendekli wusprolm Sesoanam, ten keknamangas wohavm. ¹⁶ Pikian tokolla eva mulla monglara, honi moamba novol velohvna,

KING KUWUL, INDKUMBINA KING KUWULNA, WO EVA MENDEKLI, INDKUMBINA MENDEKLIMUNDILNA.

¹⁷ Wo henga kava nonglana, mongova ov-songolnindriniva sena lohvena okombara. Himba winewol lohvena mindnam tuawamba, nom ten ahallohvnam sena ovra, unvna, hom prapiao mongawatilm mendekli inneram Sesoaindam.

¹⁸ Si yimba wehla vevra king kuwulmindm, val-

gonindna kuwulmindm, andrasowol indhana-mindm, hos mindm, eva nom ten he no hossra lovahmana vevnam. Si yimba nihilva indkumbi-namba wohhleinvra, ten no andranind kuwul-hui, no ombandhana andranindnahonam, eva indhanam, nom musetowondrinim. Manara, honamba indhanamba himba daos oholm viv Kristusmongo, eva hevna valgonindnahonam.

¹⁹ Wo kava nongalvna nomba sungeittatam, eva king kuwulm petharinim hevna valgonindna-honam, doa doara kusona mongawulm. Himba helvawolalm vivna nom, ten avnam hossra sena eva hevna valgonindnahonam. ²⁰ Temba daosva ohovnamba Kristusmongova, hukum vewol vina sungeittatamba, hevna moashulnindrini daspol-nahonamba. Nomba moashulnindrini daspolva lohvnamba, heta mendekli andrava vewol ve-navna sungeittatanamba. No moashulnindrini daspolva honamba mendekliandraava vevna, das-wotalm nom indhanam, ten no sungeittatana lehvohalna avnam, wo sembayang vinivnam hena lehvohalm, noi ten indhana englana neng-nam vinam.

Doa noi moashulnindrini daspolm eva sungeittatam, hembra doa pelpiapovwolna pehnana suwemella, hon boalva doara di telowovna. ²¹ Henamba valgonindmba helvakomo vina ovlakasbonana, nona ten piviavnam mengshara, nona ten hossra ten lohmana velohvnam. Manatuwa manatuwa provnamba, nihilva wehlawolvna, venamba, pilivhoawol vilona hembra.

20

Setanmba Buirava Os Ana, Osomba 1,000Pelara Lohmanana.

¹ Wo henga mongom kava nonglavongo vevna, holopevna ovsongolnindriniva senamini. Hevna englana himba wulluhvna kuntiva no mel endalhuinamba. Wo hev vena, we mendekli pelvpethana mongona englanamba. ² Wo doa ovsongolnindriniva phona, saiholam mendeklim soltho englana, nom Setanmba. Hanoi pimba wetat owol vev Sesoaindamba, nonamba pimba indkoklava vivpa, hevm doaramini tamol otuvulvna. Wo ovsongolnindriniva hembra nomba wenamba ningilihana, os 1,000pelara osomba lohmanana.

³ Doa os ovsongolnindriniva ningesa pipihana no mellava endalhuirava, wo melna kewul ehathanamba, keknam kunti wohve. Honamba ovsongolnindriniva osm wohvena, himba hengava daswotomana vevramoa indhanamba pethanindmba, verava, noi 1,000pelara oso kohara. Wo dawonamba sismba 1,000pelara osomba koharava, si hembra os pewoleihivav beswonamba, almba ambo eskand, ekwonamba owai.

⁴ Wo kava nongalna vuhem snal, ona king kuwulna vuhe, wo indhanamba aevulvna nosra. Hembra doa daswolna moalamangva, nonamba lesvhoawolalmba indhanamba. Memba indsongolva, henona ten helvakomo vinam, noinda himba keknam undnahonam lovahmanavna Yesusm, eva Yesusmom eishovnam. Himba owai, sembayang vinivnamoa sungeittatamba, eva hena lehvoahmba. Himba

dumbnamoa owai, lehvothalva sungeittatanamba hevna mirava englarava.

Himba doa henga beswonam phovhoana pokamariniva, wo kuwul ilvahvna Kristusmongo, venamba, 1,000pelara osomba luhunvna. ⁵ Memba noi mimirini, ten hesna pulvonam pokamarini. Nomba temba Kristusnindmba monglamba dalnamba, osomba 1000pelara piahila vilangarava, wo heva verava, si os himba phopiavav. ⁶ Nomba indhanamindva, nomba miva temba phosohv-namba, Sesoava doa hevelm hembra awothowol vena, wo heoa indk vithivra. Manara, Sesoava si hembra hukum vewol vevavmoa suwerava, os ningthiv, sisminim hengam dalvram. Owai, himba si os Sesoana sembayang andranindilm-sna avav, vera, Sesoana eva Kristusna. Wo non-amba himba si king kuwulalmsna avra Kristus-mongo, honamba osomba 1000pelarava piahila vilangavrava.

Setanmba Doa Sesoava Wohollana.

⁷ Nonamba 1,000pelarava osomba koharava, Setanmba si phovav beswonamba os buiriniva. ⁸ Himba si wohphovav, annindm annindm indkumbim daswotomanalm pethanindm, vera Goknindm eva Makoknindm. Setanmba si huhul vevav hembra, Sesoamongom daosm oholm. Diva si esvema indhanamba, os maim ora, engal wanpethalla lohv. ⁹ Wo si Setannamba valgonindva wolaihawolavra ahnam pethamonam, wo kelam aiwo angawulinvra Sesoatindinindmba, no vuherava temba himba avrava, eva no kotam, Sesoa hev ten und vevna mindnam. Wo heva os suwemba

si senamini vetperava, wohtelahavav hembra.
¹⁰ Wo Setanmba, himba temba daswotomana vevnamba, wo noinda osva Sesoava doa hembra pilpiapahana mendekli mella, di suwe boalla, sungeittatanahonam, eva gurudaspolm mongawulm. Wo di himba si buirava aevulvav nihsesoanahonamba, osva sia okomba yunalm yunalm osangas.

Annindm Annindm Vavawonam Indhanam Lesvhoawolalm.

¹¹ Wo kava nonglavna mendeklim dombalm king kuwulna vuhem, wo mongova avna sena nosra. Wo pethana ovna henaminiva bukithana, hoai wohvilovna. ¹² Wo kava nongalvna indhanam, nom bimbsnindm, eva nom ahalakoholnindm, di lovahvna no king kuwulna vuhepethalla. Doa dalvnamba, wo henga phovhoa. Ovsongolnindva pevhoawol vivna tombaiva, nomba manimani temba indhanamba vivnamba. Mongo henga pevhuei, memba noi indhanana, beswonam si wohavavm yunalm. Indhanariniva nomba avpa king kuwulna vuhesrava, himba moamba nonglav no tombairiniva, wo lesvhoawol vavov nona indkumbimba.

¹³ Wanplombva vendhapho vevna, nomba temba dalvnamba doarava wanmerava. Mind eva mindkembel, noi ten dalvnam, himba phopianamba, Sesoana wetatram anga. Memba osm, hengava si indhanamba dalvavmoa. Henom henom indakonda helmhola vewol vivna nona, manimani hevpa temba vivnamba doarava.
¹⁴⁻¹⁵ Wo indkumbiva indhanamba, nihilva lopo veluhungu vinvmoa tombairava, temba

noindava kilihavpa, beswonamba yunalmba wohalmba, hembra eva doa pingipuv venata nomba mella, ten suwe tawovnam. Nomba mendekli melva os ningthiv, sism henga dalvram. Wo mindm sihalm, eva vuhem, ten noinda mindsongo avnam, hengava si nomba lohvavmoa.

21

Sesoava Vena Manimani Henga Nemel, Ovm Nemelm, Petham Nemelm.

¹ Wo nonamba kava sismba nongalna ovm nemelm, petham nemelm. Nomba seilminiva ovi pethaiva hoai vewolna. Wo owai, wanmba livnamoa. ² Wo kava nonglavna nom nemelm kotam holapevna senamini Sesoanamini. Nomba kotava nemelnonoa Yerusalem, Sesoana kotanonoa. Himba hevmba kokolma vrenamba, os maim ovna, ungevlirini lotv hevm, nonam tlaram nungulm vivm ten. ³ Wo kava hellevna vevandwonam moalamangva ophovna no king kuwulna vuherini. Nomba moamba os ovna,

Hillu, daipotava Sesoana vuhemba men lohv indhanana hovra. Himba si wonavav mongawulm hembra, wo himba os avav hetindinonoa. Sesoava hevpa si wonavra hembra, wo himba si luhunvav hena Seso. ⁴ Himba si poswol wohvinvav indkumbina wenopva hena novriniva. Hengava si lohvavmoa, osva dalalm, kumungilsnam alm, wenumbsnam alm, nihsesowaposwam. Manimani doaraminiva doa engvapiangana.

⁵ Wo no indhanariniva temba avnamba no king kuwulna vuherava, hev ona, hillu, kava lehwol vev manam manam nemelmangas. Wo hev kam omnana, novol vewol veo honaoa, noinda honamba moamba tanam, wo lehrangas, memba yemba kava daipotava ishonnava.

⁶ Wo kamba henga omnana, doata, honamba manimani os ambo lohv. Kangasta men minindriva eva eunillinononoava. Kava si dahwol vavovav pomba, beswonam tovalpva, noindava kilihavpa almba indkumbimba, nomba hembra temba pehava vinvrava. Nomba si ambo nis hlavra dihui. ⁷ Himba nomba mongova kuvhoawol vetava daosmba, si vravav honamba vuhembra nemelva Sesoaindava. Wo kava si lohvvav hena Seso, wo himba si lohvvav kana ombol.

⁸ Heva os himba nomba pekmik vetava, Kristusmba engalmba, himba nomba sambla undva vrowollava, keknamba undnahonamba loholmba, anvema vevav mana vemava sahoklalva, anvema helvakomo vevra, anvema ongariskui vevra, anvema pulmoava ishovra, anvema sembayang venavra tihsongomba, wo anvema ishovra moangakalamomba, manimani honanamba vuhembra luhunv di suwemella mendeklira, ten wohlon vavovm ambo osangas. Honamba os ningthiv, sism henga dalvram.

Yonmba Kota Nemelmba Nonglana, Sipsip Otolna Ongalmsna.

⁹ Mongo ovsongolnindrini kaindam provna. Himba noi mongo, ten 7pelara lovahvnam doara, himba doara pirinna golna iambnam Sesoana eunillini kin. Hev omnana kam, kam engpro.

Ata kava yemba indthoamnavav sipsip otolna ongalmba. ¹⁰ Sesoasongol kamba nihra vrevna, wo nomba ovsongolnindriniva os waiwohgana kamba vuvimsna olo anavlasallam mendekliram. Wo himba di kamba indthoamnana Yerusalem, holapevna senamini Sesoanamini. ¹¹ Hevm nehramohra vethavna pusambanakambara Sesoanana. Os nehramohra vethavna, ovna hon, noi di ten esvema vongamnavm, yaspa. Dendovna, ovna glasnonoa.

¹² Wo nomba kotava ilohvna mendekli sena pueilmengva, 12pelara tuvpa velaihangoawol velohvna. Wo no 12pelarava tuvrava, 12pelara ovsongolnindva lovahliangavna. No tuvrava indakonda novol vewol vungeluhunvna nihilva henona henona no 12pelara aratindinamba Israelnindnamba. ¹³ Diva nohalva okomba pholsisva samblamong lovahvna tuvpa, samblamong ahnam, mongona ahnasis samblamong, samblamong okomba vohalsis. ¹⁴ Nomba pueilva kotanamba honmba 12pelara nonapopolmba kekaiv vialmba endallamba. No honsrava novol veluhginvna nihilva 12pelara moalamangnindna sipsip otolna.

¹⁵ Wo no ovsongolnindriniva, himba temba kamba waiisholohvnamba, himba gol lohoh wulluhvna. Himba nomba lohohva wulluhvna, nonam lohoh velm kotam, tuvm, eva pueilm.

¹⁶ Nomba kotava ehalsambala lohohra, moskumbul sambala lohohra, os lohvna. Vena, tokwonam eva mendekli lohohrangas wohlohwohvna. Ovsongolnindriniva lohoh vena kotamba hevna gol lohohna. Wo nomba kota mara os lohvnama, 2,400 pelara kilomita hivema hevm tokolva, 2,400

pelara kilomita hivema ahnamba, wo eva 2,400 pelara kilomita osva hivema hevm ovkakara senava. ¹⁷ Wo ovsongolnindrini vena, pueilm lohoh vena. Ambo mara os lohnama, 75 pelara mita senamba. Nomba lohohva ovsongolnindrini vena snal vrevna, men piv vewol vivm, deuvm nona lohoh vivm.

¹⁸ Nomba pueilmba honna vina, yaspa. Wo kotava wohveliheina golnangas, os nehramohra vevna, ovna glas. ¹⁹ Endalva no kotanamba pueilva ilohvna huhva os snanovna snanovna mendekli diva.

Nomba boalgalliniva, honmba besal hevm nesmosal, yaspa.

Wo mongova pethamnalva honmba sembol sapaiananihna.

Wo mongova honmba, nomba aket.

Wo mongova tevlapihanal honmba, emeral.

²⁰ Wo mongova hengava hon satoniksva snal vena, aambul, dombal.

Wo mongova hengava honmba aambul, konilian.

Wo mongova hengava سوال honmba, krisolaitva.

Wo mongova hengava ambo indatovna tevlapihanal hon, berilva.

Wo mongova hengava indanam سوال honmba, topasva.

Wo mongova hengava hon, krisopres.

Wo mongova hengava haiasin hon.

Wo mongova hengava indanam hon aambul, ametis.

²¹ Nomba tuvpa 12pelarava wohlundthoana huhmohnana snal, ovna wos, os sevriv, peral.

Wo diva sena hevm vongamnavna. Nomba tuvmba indakonda wohlehra vethana no mendeklina vosna. Wo nomba monamba kotamerava wohsingthana golnangas, wo nomba golva dendovna, ovna glas.

²² Kava nonglavnamoa, mongova tempelduvpa lohvnamo diva no kotarava. Owai, Sesoa mendekli av manana manana keknamangas, sipsip otolm waiav, hev waiav, osva tempelduvolmba temba. ²³ Wo nomba kotava owai, okombana weisnamba lovhoasiha vevmoa. Owai, mendekliva pusambakamba Sesoa hevnamini lovhoapiha venavna kotamba. Wo sipsip otolva himba lohvena lampumsna no kotamba hev. ²⁴ Indkumbi indhanamba hindtindirini, hindtindirini si ahalakoho vevra no kotanakambara. Wo king kuwulva pethariniva vavawonamba si manimani hevnamba besalangas wulpromnavra domba hembra. ²⁵ Himba tuvpa nomba pepava wulangavramoa no kotanamba. Tuvpa ambo os velaihawol velohvra, manara noinda simba ata kilvrawolvavmoa no kotarava.

²⁶ Manimani huhmohna dinamba indhananamba indkumbinamba, himba si wulsihamnavra hem. ²⁷ Heva os mana vemava sahoklalva, wo indhanamba temba vewol vivpa sna wevsakoklava, wo moangakala indhana, himba si owaimomolmba saivvavmoa hona kotarava. No indhanangas, ten henona nihil lovahinvm no tombairava, temba noindava kilhavpa, beswonamba yunalmba almba, nomba tombaiva sipsip otolna, hengas si saivra hona kotarava.

22

¹ Wo nomba ovsongolnindriniva indthoam-nana kam pom nom, pom noinda suvevna nonapopolm. Nomba pomba nehramohra vethavna glasmsna. Wo nomba pomba phovna king kuwul Sesoanamini, eva sipsip otolnamini, hevna vuhesingrini. ² Wo os engangavna monahulumbkumbimba hovrava kotamerava. Wo timba nomba noindava kilihavpa, mongnahalm popethal lohvna. Movolva os prowolohvna no weisnam, no weisnam, vevnamba, weisva 12pelara lohmanavna. Wo no tina vlevva, indhanam nonam vendwolaihawolalm. ³ Manam manam sahoklalva lesvhoawolalmba, Sesoava nengvmoa, lohvavmoa hona kotarava. King kuwulna vuhe dihelinv hona kotarava, Sesoa arana eva sipsip otolna. Wo Sesoana andranindva si hembra sembayang vevuvmona venavra. ⁴ Himba si nunglmivra hena novlomosmba, wo hena nihilva si novol vewol vilenginvav hena mira. ⁵ Diva hengava si simba kilvravavmoa. Noinda himba si ningvavmoa, lampumba lawolalmba, eva okombava. Si Sesoa mendekli vrahunvav pusambakambava. Wo Sesoanindva si moamba iolvohvav king kuwulmsna yunalmba osangas.

Yesus Os Ona, Kava Lilnam Si Provav.

⁶ Wo ovsongolnindrini omnana kamba, honamba moamba tanam, memba kava yemba vrahovva, si wohlohvav yunalm. Manara, Sesoa mendekliva doa hevna moashulnindmba otuhtwol vena, ishohmba. Himba wolapra vena

ovsongolnindmba, indvunilm hevna indhanam, nom manimani nooa os wohvera lilnam.

⁷ Hillu, Yesus unna, kava provav lelnam si. Himba nomba enginvrava moamba honamba, memba novol velohvpa hona tombairava, heoa nooa indk vithira.

⁸ Kava Yon, ka honi vena, hellena eva nonglana honam manam manam. Nonamba kava vena, hellevna, eva nongalvna nom, kava mulumbdandna lohvoamnavna, sembayang vevna ovsongolnindrinina monglasra, henoi-inda ten he manam manam kam nov wolaihamnanam. ⁹ Wo heva os ovsongolnindriniva kamba omnana, manam yimba kamba sembayang venav. Kava andranindrini, os men ye eva pevna mongawa moashulnind. Kava ambo andranindrini, snal henoi ten engivm hona moam tombairinim. Sembayangna okulivm Sesoam.

¹⁰ Wo henga ovsongolnindriniva omnana kamba, manam yimba kokmondha vrevra moamba hona tombairiniva. Manara, doa nambaiva mumra vev honamba, osmba manam manam velmba. ¹¹ Himba nomba memba viwul vevpa sahonamba, ambo hemoa numbulu, viwul vevra. Himba nomba nihvuhinnamba avrava, ambo hemoa numbulu, nihvuhinmungilva aevulvra. Wo himba nomba temba lehrava viwul vevrava, eva henomoa numbulvmta, viwul vevra beswonamba. Himba nomba temba aevulvra nihvuhin kethawolhuiva, numbulu, heoa osangas aevulla, nihvuhin kethawolhui. Manara, Yesusva lilnam si provav.

¹² Yesus ona, hillu, kava si nambaiva pelpiavav-moa, prolmba. Kav si iprunvav esesmba. Kava si esesmba vivvra indakondam, noindava himba temba hevpa vivnamba, sahonam eva besalm. ¹³ Men kangas lohv, osva mimirini eva eunillini, nowallini eva movondallini.

¹⁴ Nomba indhanamba, temba posvendnamba hevna pikianmba, heoa indk vithira. Manara, osva Sesoava si hembra wuhhovav, hlalmba timovpa, nomba no tirava kilhavpa. Himba wohsaiavra tuvra kotameranonoamba. ¹⁵ Heva os ambarava no kotarava mindnam indhanakoklava, nomba himba temba manapulna manapulna viwul vevpa, himba temba ongariskuiva viwul vevnamba, ahalvakomo, tihsongom okolowol vivna sembayangna, inetesna indhana eva moangakala indhana.

¹⁶ Ka Yesus wolaihaprana kavna ov-songolnindrinimba, ishunilm honam yem Sesoanindm indakondam. Kava sespel luhunv Devittindirini. Kava ongilihallini hulvundkumbi, kavnakambara kava lohv.

¹⁷ Sesoasongol eva sipsip otolna ongal, himba os ohona, pro. Wo indkumbiva yimba hona moamba hillivrava, eva yeoa os uvmta, pro. Mongova henonamba omomba kongla vevrava, henooa ambvra. Himba nomba pomba nelmba vevrava, heoa nooa ambvrava, hlalm pom, nom nonapopolm avm.

Yonna Eunilmoa.

¹⁸ Kava Yon ongawolv indkumbim, himba nomba memba hillivpa moamba hona tombairiniva. Wo himba nomba mongova

hevna moamba honindava mushhoatava hona moarava, Sesoava si kinmba nombas holothomnavav, novol velohv honamba tombaira. ¹⁹ Wo eva himba nomba mongova moamba monglava hona tombairiniva poswol vetava, Sesoava eva si manimani henaminiva os dembhanga venavavta. Wo himba si hona timovpa nevavmoa, honindava memba kilihavpa, wō hona kotanemellava si avavmoa.

²⁰ Yesus he ona nomba, osva honamba manimani tanamangas. Doa hev ona, tanam kava lelnam ten prov.

Tanamta, pro, mendekli Yesus. ²¹ Wavra mendeklina Yesusna yemoa pilivhoawol vera indkumbimoa, doata.

**Sesoana Besal Nemelmoa Walsana Moana
Genesis, Ruth, Jonah, and The New Testament in the
Waris Language, also called the Walsa Language, of
Papua New Guinea
Buk Stat, Rut, Jona, na Nupela Testamen long tokples
Waris long Niugini**

Copyright © 2002 The Bible Society of Papua New Guinea

Language: Walsa/Waris (Waris)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 24 Apr 2020

81136742-8dfd-57f5-95ae-cd3afb267b0d